

四庫全書

史部

欽定四庫全書

史部

浙江通志卷二百三十二

詳校官給事中臣戴璐

檢討

臣

德生覆勘

總校官編修臣倉聖脉

校對官中書臣石鴻緒

謄錄監生臣包文訓

欽定四庫全書

浙江通志卷二百三十二

寺觀

七

台州府

下

天台縣

國清寺

赤城志在縣北一十里舊名天台隋開皇

十八年為僧智顗建先是顗修禪於此夢定光告

曰寺若成國即清大業中遂改名國清李邕記所

謂應運建寺是也唐大中年重建額為柳公權書  
宋景德二年珍賜甚夥後燬於寇獨顓手題蓮經  
與西域貝多葉一卷及隋旃檀佛像佛牙僅存建  
炎二年重新之寺左右有五峯雙澗號四絕之一

晏公類要齊州靈巖荊州玉泉  
潤州棲霞台州國清世稱四絕

上有三賢堂錫杖

泉香積厨有歌羅大神像寺前有新羅園唐新羅  
僧悟空所基東南有祥雲峯拾得巖東有清音亭  
其最高處有更好堂寺後巖有瀑布循澗而上尤

為奇勝天台山方外志元至正間建雨華亭築萬

工池明洪武甲子大風雨殿宇摧毀隆慶庚午重

建大雄殿嗣燬萬歷乙未重建壬寅賜御經一藏

建藏經閣

皮日休寄題天台國清寺詩十里松門國清路飯猿臺上菩提樹怪來煙雨落

晴天原是海風吹瀑布陸龜蒙寄題天台國清寺詩峯帶樓臺天外立明河色近眾恩濕松間石上定僧寒半夜猶溪水聲急杜荀鶴國清寺詩一到天台寺高低景旋生共僧巖上坐見客海邊行野色人耕破山根浪打鳴忙時向閒處不覺有閒情章得象國清寺詩松韻蕭騷十里清入門毛骨冷如冰題詩已有丹青筆悟法應多黑白僧風雨只疑雙澗瀑星辰長認上方燈來遊不是忘機客誰

欽定四庫全書

卷一百三十二

到雲峯第一層釋德榮題國清寺詩竹院深深近  
翠微短簾容易掩斜暉香殘瓦鼎僧初定月上松  
巢鶴未歸落澗只供煎茗水飛雲留伴坐  
禪衣客遊正值春將半風落桃花片片飛

國朝康熙十八年修雍正十一年奉

勅動帑鼎建十二年

御書華嚴淨域四字扁額

闡法寺 天台山方外志在縣南五里晉黎護將軍

劉元捨宅建名建平舊傳元因遇雨感金錢之異  
建寺原在縣南一十步後有鴿子和尚徙今地號

鴿子道場寺側有靈龜峯又有綴石坡陀迤邐草木蒙茂左右溪流縈帶民居皆樹桃花熙春彌望如綺錯焉宋祥符元年改今額紹定四年縣令潘晉孫篆額明洪武初廢後許原平捐金助建

善興寺 台州府志在縣東北六十里舊名華頂圓覺道場晉天福元年僧德韶建僧智顓嘗晏坐於此有降魔塔伏虎壇鬼疊石白雲先生室井泉先生居又傳有葛元茶圃王羲之墨池宋治平三年

改今額明洪武四年燬僧宗濟重興隆慶中又燬  
復新之

禪林寺 台州府志在縣西南一十五里舊名龍山  
集雲院僧智顗建唐天寶六年改龍山為始豐宋  
乾德二年改龍山崇修大中祥符元年改今額

石橋寺 台州府志在縣北五十里相傳五百應真  
之境宋建中靖國元年建後燬紹興四年重建有  
觀音應真閣今有上下方廣寺



國朝康熙十七年有范若鑄者祝髮名體弘傾資重修  
更建大悲閣

大慈寺 赤城志在縣北二十九里陳時為僧智顓  
建蓋顓思修初地及定光受記銀地之所直寺門  
巽隅號佛壇顓第二宴坐處隋創國清乃更寺為  
道場宋大中祥符元年改今額其法堂曰淨名以

顓嘗講是經故也

寺有顓所供普賢及手書陀羅尼經隋朝所賜寶冠尚存有漱

玉亭又有虞世南所書華嚴經紹興中為秦檜取去鴻爪集唐梁肅撰碑尚

在天台縣志明洪武十七年寺為風雨所壞僧德

興重建

葉清臣大慈寺詩佛壠光沉茂草平林間  
猶作誦經聲一心三觀休分別秋靜山高

海月明洪适遊大慈寺詩振策快秋晴伽藍倚翠  
屏看雲不留瞬對竹已忘形銀地傳千載虹橋拱

百靈至今鐘磬  
響如講淨名經

天封寺

嘉靖浙江通志在縣北五十里天台山方

外志陳大建七年僧智顗建初顗入山見一老父

告云師卜菴遇盤石可止其後果如所告遂結廬

焉因自號靈墟蓋第五思修地其注涅槃經處號

智者嶺中有卓錫泉北望一峯摩雲即華頂也隋  
開皇五年賜號靈墟道場漢乾祐中改智者院宋  
治平三年改今額舊有瑞雲閣

萬年報恩光孝寺 天台縣志在縣西北六十里赤  
城志唐太和七年僧普岸建初晉興寧中僧曇猷  
憇此四顧八峯回抱雙澗合流以為真福田也遂  
經始焉唐大中年號鎮國平田梁龍德中改福田  
宋雍熙二年改壽昌建中靖國初火崇寧三年重

建號天寧萬壽紹興九年改報恩光孝先是太平  
天禧中累賜袈衣寶蓋及御袍履諸珍玩甚衆有  
親到堂妙蓮閣覽衆亭淳熙十四年日本國僧榮  
西建三門西廡仍開大池香積有釜極深廣世傳  
閻提首那尊者所鑄東南十里有嶺曰羅漢巨杉  
偃蹇絜之大百圍凡供五百大士必於是邀請云  
天台縣志明萬厯十五年李太后賜藏經知縣毛  
鶴騰建藏經閣

張舜民題萬年寺詩休論雪竇與  
雲峯且看天台劍戟叢萬水千山

來閣上一花六葉見池中誰將色界填空界不離  
香風席祖風有底妙蓮談不盡却成賦筆與興公  
陳知柔萬年寺詩古寺來投宿雲巖第幾層有詩  
堪供佛無事且依僧小閣泉喧枕修廊雨暗燈好  
峯看未足幽夢幾回登洪迺雨中宿萬年寺詩夢  
回深夜耿秋燈泉竇爭流一味清過雁不聞天外  
影寒松長送枕邊聲簷風可但久無賴急雨那  
能便寢行已問瓊臺雙闕路此心何必羨層城

國朝順治初燬僧無礙重興

翠屏寺 台州府志在縣西南三十五里唐乾符二

年建先是吳赤烏中有周禪師居此以山如屏峙

名翠屏菴宋治平三年改淨安院今為翠屏寺

趙師

秀翠屏寺詩石巖看不見翠色自重重春雨生松  
葉山風響鐵鐘碑頽工廢墨草嫩綠添茸住院吳

僧老相迎  
憶舊逢

慈雲寺 赤城志在縣西北三十五里舊名安國雲

居院晉天福五年建蓋僧德韶第二道場宋大中

祥符元年改今額隆興初併入護國今復興有雙

松亭天台山方外志寺廢明萬厯間僧真清與弟

子如惺重新之

晁公為遊慈雲寺詩雲問龍蹤千  
尋餘地底雷奔萬仞泉寄與廬山

舊遊客此中  
端不減棲賢

白巖寺

天台縣志在縣西北十四都宋末僧普耀

初憇此地有神江白郎告曰此吾居也以師德業  
尊廣願推此室相奉遂呼白巖隋大業中僧純陀  
徙平地五十步唐貞觀十年賜號白巖寺會昌中  
廢咸通二年重建宋大中祥符六年改賜妙智寺  
今復為白巖舊有列秀亭王羲之墨池

高明寺

台州府志在縣東北十一都按舊經本名

高明唐天祐七年建今攷錢氏所藏遺墨乃清泰

三年號智者幽溪道場今殿前有石經幢刻云天  
福二年捨入幽溪禪院可驗也宋大中祥符元年  
改淨名不知何時復今額故老相傳謂先此惟喬  
木參天薜蘿翳坎廐廐是居樵牧罕至智者大師  
時居佛隴講淨名經忽經為風飄翩翩不下乃杖  
錫披荆尋經所詣行五里許風息而經憇此大師  
乃即其地以營淨居智者十二刹此其一也明嘉  
靖間寺廢萬厯中僧傳燈重建內有元雲洞看雲



石

王範高明寺詩偶來穿竹逕迤邐叩山名怪石堆成洞幽泉噴作聲看雲僧入定冒雨客偕行

一夜曇花發

靈根何處生

無相寺

赤城志在縣西南三十五里舊名瑞龍巖

北號戲龍唐咸通二年建時有僧師簡以杖叩卧龍起雨故名遠近勝槩凡十宋大中祥符元年改今額治平中徙今處

崇善寺

天台山方外志在縣北赤城山下晉太元

二年建先是興寧中僧曇猷依巖造寺號中巖後

多赤蟻徙平地宋大中祥符元年改今額放生池

在焉

許渾題中巖寺詩蒼蒼松檜陰曉月露西岑素壁秋燈暗紅爐夜火深厨間山鼠散鐘盡

隴猿吟行役方如此逢師懶話心

謹按舊經作太康初建寺考高僧傳曇猷興寧中至台嶺若以為太康則至猷已有寺百餘年矣

通圓定慧寺 天台縣志在縣北十一都周顯德四

年建德韶國師第一道場也宋大中祥符元年改

淨名院明天啓壬戌僧圓悟重興仍舊額

國朝康熙壬戌僧善鄮復修

寧國寺

天台山方外志在縣西四十五里梁普通

三年僧智達伐翳結廬每誦經則羣鶴翔空紫雲  
覆頂故山名紫凝後建寺名棲禪唐會昌中廢大  
中五年重建宋大中祥符元年改今額天聖四年  
僧居昱新之明初廢今重建

寒巖寺

天台山方外志在縣西北寒石山舊名崇

福梁開平元年建蓋寒山子棲隱處周顯德中改  
聖壽昭儀孫氏重新之由明巖北五里而上四山

聳秀水流亂山間鏘如環珮院宇周阿並置巖下  
窻扉軒戶開闔於煙雲紫翠中故南山之標勝者

推寒明二巖宋大中祥符三年改福善院今稱寒

巖寺

洪适題寒巖寺詩峭壁插青冥層巖覆化城  
空中清磬發幽處慧燈明萬瓦是雲氣四簷

無雨聲豐干不饒舌此地孰知名許廣大寒巖寺  
詩幽尋入藤蘿谷轉樵徑少夕陽度遠岑鐘聲出  
林杪陰風吹空壑招提極深窅中有茹芝人冥搜  
事幽討揮手謝時人高蹈羣峯表石床思舊遊春  
林忽啼鳥夜來山  
雨多苔荒落清曉

明巖寺 赤城志在縣西北明巖五代時僧全宰棲

焉入門兩石夾峙號石門前對幽石橫敞飛閣巖  
竇嵌空堂宇半居其下大槩如寒石山台州府志  
宋大中祥符元年改為大梵今復為明巖

慈聖寺

天台縣志在縣西北十五都舊名蹟聖宋

治平三年改今額後圯

國朝順治八年庠生陳必逢捐香燈田重建

淨慧寺

赤城志在縣西九十里舊名寶慈唐乾化

元年僧景瑫建蓋天台十八剎之一也舊為隋高

僧飛錫處及是瑫卓菴已而造寺燃栢香密禱以  
煙至處為址焉宋大中祥符元年改今額台州府  
志舊傳葛元嘗植蘆數本故今寺前有蘆峯

廣嚴寺 台州府志在縣西五十里舊名長隴唐光  
啟三年建凡三徙至今地宋治平元年改今額舊  
傳寺鑄鐘久不就有老嫗投一錢於冶中鐘即成  
而錢宛然號貧婆鐘有懷容羅漢真身在焉

真覺寺 台州府志在縣北二十三里隋開皇十七

年建僧智顗瘞焉龕前置雙石塔號定慧真身塔  
院宋大中祥符元年改今額

九明寺 台州府志在縣東北三十里漢乾祐二年  
建僧智顗宴坐九折道場

普門寺 台州府志在縣西南七十里漢乾祐三年  
建宋祥符元年改福應僧德韶第六道場今復為  
普門

天宮寺 台州府志在縣西三十里舊名旃檀瑞像

院吳越時僧德韶建號第十一道場宋乾符元年  
改今額

開巖寺 台州府志在縣西南四十里梁普通三年  
建初有異僧壁開此巖六瑞繽紛如雪賜額曰天  
花尊者開巖院宋祥符元年改鎮國院明洪武中  
廢重建名開巖

普光寺 台州府志在縣西北三十里僧德韶第十  
三道場舊名大覺普光塔院宋祥符元年改慧覺



後復為普光

清心寺 台州府志在縣東十里山名招隱下有石泓如釜昔智顗放螺溪中舊號螺溪院宋治平三年改今額

金地菴 台州府志縣西二十五里石晉開運三年建梁大同初僧定光卓菴居之巽峯有枯石數片屹然林莽間謂之招手石語云定光金地遙招手智者江陵暗點頭今廢

宿佛寺 台州府志在四顧坪明正德間佛樹禪師  
裝五百聖僧像萬厯間僧理殊新之司寇王宗沐  
題曰宿佛

桐栢崇道觀 天台山志在縣北二十五里赤城志  
舊名桐栢觀唐景雲二年為司馬承禎建台州府  
志曰環有九峯曰玉女卧龍紫霄翠微玉泉蓮花  
青琳香林玉霄自福聖觀北盤折而上及至洞門  
長松夾道吳赤烏二年葛元即此煉丹有朝斗壇

泊承禎建堂有雲五色因禁封內四十里無得樵

採又傳承禎所居黃雲常覆其上故有黃雲堂

崔尚

桐栢觀碑記桐栢山高萬八千丈周回八百里中有洞天號曰金庭宮即右弼王子晉之所處也古觀荒廢久矣故老相傳云昔葛仙翁始居此地而後有道之士往往因之壇址五六厥跡猶在泊乎我唐有司馬鍊師居焉景雲中天子布命於下新作桐栢觀其高居八重之一俯臨千仞之餘背陰向陽審曲面勢東西數百步南北亦如之連山皆碧茂樹常青大巖之前橫嶺之上雙峯如闕中天豁開長澗南瀉諸泉合漱一道瀑布百丈懸流仙花靈草春秋互發幽鳥青猿晨夜合響總括奧秘鬱為秀絕非天神與仙宅其孰能致斯哉然後為虛室以鑿戶起層臺而累土經之殖殖成之翼翼

花散金地香通元極真侶好道是游斯息微我鍊  
師孰能興之朝散大夫使持節台州諸軍事守台  
州刺史上柱國賈公名長源謂別駕蔡欽宗等曰  
道以含德德以致美美而不頌後代何觀乃相與  
立石紀頌其辭曰邈彼天台嵯峨崔嵬下臨滄海  
遙望蓬萊漫漫若天合呀若地開煙雲路通真仙時  
來顧我鍊師於彼瓊臺鍊師鍊師道入玄微喻曰  
安坐凌雲欲飛興廢靈觀鍊師攸贊道無不為美  
哉輪奐窈窕茫茫通天降  
祥保我皇唐如山是帝

太和咸通中道士徐靈

府葉藏質新之梁開平中改觀為宮周廣順二年  
道士朱霄外建藏殿宋大中祥符元年改今額紹  
興二十二年楊和王存中重建三清殿曹開府勛

建三門曹又於觀北結庵賜號冲嗇云

天台縣志觀中舊有

元晨壇煉形室鳳軫臺朝真壇龍章閣又有衆妙臺以篆隸八分三體寫道德經於巨幢置臺上故

名屢朝宣賜則有宋太宗真宗御書共五十三卷祥符中御衣四事高宗史漢事實翰墨志用高麗僧統所織成經簾二帙裏吳越國王所捨銅像天尊一十身連金銀銅所鑄火焰臺座檀香三清像一龕計二百六十身玉花八株銅三清像金銀天字經二百函睦親宅昭成太子宮聖蹟四十軸天

台山方外志明吳元年觀燬洪武中道士金靜觀

提點吳惟敬相繼營建永樂十年道紀鮑了靜又

新之觀中碑刻十數獨崔尚所作碑頌存

宋之問寄天台

欽定四庫全書

卷二百三十二

司馬道士詩卧來生白髮覽鏡已成絲遠媿餐霞  
子童顏長自持舊遊惜疏曠微尚日磷緇不寄西  
山藥何由東海期李嶠送司馬先生詩蓬閣桃源  
兩處分人間海上不相聞一朝琴裏悲黃鶴何日  
山頭望白雲孟浩然宿天台桐栢觀詩海泛信風  
帆夕宿逗雲島緬尋滄海趣近愛赤城好捫蘿亦  
踐苔輟棹逕窮討息蔭憩桐栢采芳弄芝草鵲唳  
清露垂雞鳴信潮早願言解纓紱從此去煩惱高  
步凌四明挑跡得二老紛吾遠遊意學彼長生道  
日夕望三山雲濤空浩浩任翻宿桐栢觀詩飄飄  
雲外客暫宿聚仙堂半夜人無語中宵月送涼鶴  
歸高樹靜螢過小池光不得多時住門開自是忙  
周朴桐栢觀詩東南一境清心目有此千峯插翠  
微人在下方衡月上鶴從高處破煙飛巖深水落  
寒侵骨門靜花間色照衣欲識  
蓬萊今便是更於何處學忘機

國朝雍正十年奉

旨動帑鼎建遣官督視於十二年正月訖工

福聖觀 台州府志在桐栢山西南瀑布巖下吳赤

烏二年為葛元建舊名天台額乃元飛白書西北

枕翠屏上有三井號三絕之一洩為瀑布蔽崖而

下狀如垂蛻數百丈有濺珠亭又有隱真中峯蓋

梁徐則所居之處唐咸通中刺史姚鵠建老君殿

宋大中祥符四年改今額紹興十一年置九天僕

射祠按衆真記夷齊死為九天僕射治天台山三  
十年侍郎楊僕妻趙氏以老君殿建三清殿明初  
併入桐栢觀

紫陽觀 在縣南三十里百步溪宋紫陽真人張用  
誠顯化於此舊有真人石像

國朝雍正十一年奉

勅建祠名紫陽觀

佑聖觀 天台山方外志在縣東一百步妙山上舊



係城隍廟基宇宣和間徙於縣之東北隅南渡後  
曹開府勛建觀而境民崇奉香火不廢

仙居縣

顯慶寺 仙居縣志在縣西五十步舊在紫籜山下

名顯元梁天監二年任昉捨宅建隋大業元年廢  
唐貞觀十年重建天寶六年徙今址會昌五年廢  
大中二年復建宋祥符元年改今額宣和燬越三  
年復建淳佑八年延燎再創未竣元至元二十四

年又燬明永樂十四年建嘉靖三十四年知縣姚服璜修之天啟六年後殿與山門圯僧復初重建國朝康熙二十年僧印生祇如創準提閣於後

三學寺 仙居縣志在縣東二十里舊名西仁梁天

監元年重建改額遇明宋乾道中賜今額

舊志云景德二

年僧願鴻碑有云前枕寒流後連翠竇項斯之宅

可尋麻姑之峯堪陟曉月開林香分玉篆秋花出

定苔滿石床

金像寺

輿地碑目在縣西三十五里寺有石幢歸

然歲久剝落惟存垂拱三年立等字仙居縣志即

白塔寺舊名聖像因斲地得石佛像故名台州府

志宋治平三年改今額宣和燬紹興十二年又建

正覺寺

台州府志在縣南八里山之巔宋開寶八

年建舊名珠頭巖治平二年改賜今額寺側有石

龍鱗角嶄然稱海內奇觀寺圯僧晉珂寶環重建

福延寺

赤城志在縣西四十五里天禧三年建舊

傳僧清徹卓庵於此有猛虎馴伏焉仙居縣志即  
下葉寺

國朝康熙十八年僧德充結茅以居

萬安寺 台州府志在縣西南五十五里舊名萬壽  
唐乾符中建宋天聖六年改今額其地深窈與塵  
境絕山環水抱有茂林修竹之勝

國朝康熙十六年僧雲曇重建

崇相寺 嘉靖浙江通志在縣治西南二十五里舊

名雲峯赤城志宋開寶中建天禧元年圯於水徙  
今地改今額台州府志元至順四年重建明永樂  
十年修葺

國朝康熙十七年僧雪明重建

廣度寺 台州府志在縣北三十里紫籜山舊在西  
隅名瑞峯唐天寶元年剏晉天福中重建宋宣和  
間賜今額紹興二十年僧蘊璋徙今址寺在山頂  
中梵宇弘敞枕溪帶壑林麓衍美居者多藝竹木

左右小刹凡六有雙闕栖鳳亭諸勝

郭三益廣度寺詩義和均

四時曜靈有急節沈迷簿領書坐歎春事歇及茲  
新雨收西郊初發蒼嶺山氣嘉奔悍溪流活風  
驚麥翻浪水淨秧抽髮漸窮蕭寺幽煩使煩襟豁  
蜂喧釀蜜翅鳥落啼林血高僧日無事種秫畦畝  
澗綠苗已紆紉紫花行復結  
吾欲訪長生終歲期采擷

國朝順治初毀十八年僧巨靈重建

淨梵院 名勝志在縣西靈山仙居縣志梁天監中

建宋宣和間燬紹興五年重建

護聖寺 台州府志在縣東南四十五里方巖之麓

唐乾寧四年釋淨悟建在巖頂上後圯宋紹興十六年重建改今址元至元間燬明萬厯間重葺頗極崇麗

國朝順治十四年僧行常重修

普信寺 台州府志在縣南四十里陽峯之巔舊名興國宋開寶八年建治平三年賜額

國朝康熙八年僧蓮舟重建

廣嚴寺 台州府志在縣東北十二里白雪山麓宋

慶厯二年建昔傳羅漢榮尊者演法於此

興道院 台州府志在縣南三里南峯上宋慶厯中

建舊名興善治平三年改今額明永樂十八年僧

宗諤重建寺臨大溪上有浮圖曰南塔

國朝順治五年僧寂用重修

慈安院 台州府志在縣東北三十里仙坪山後宋

建炎三年建

國朝康熙十五年僧寂用拓址重建



靈峯院 仙居縣志在縣東北三十五里宋宣和間  
建名幽禪為西域僧越連尊者道場靖康五年改  
今額

國朝康熙四十八年僧應五重建

殊聖教院 仙居縣志在縣西北紫巖山麓舊名奉  
國宋治中改今額

國朝康熙十七年僧梅芳重建

隱真宮 赤城志在縣東南二十五里舊名隱元梁

天監五年建本吳蔡經故宅先是漢人王遠得道  
飛昇三國時遊栢蒼過經家以金丹餌之及卒舉  
棺甚輕啓函視無有越四年復返謂家人曰七月  
七日王真人當來其日王果至駕五色龍旗節導  
從甚都召經父兄見之又遣人召麻姑至曰不接  
奉五百年矣乃迭進穀膳有金盤玉笋焉王又以  
酒一斗勺水五升飲經家人後舉室上昇事聞詔  
建觀以奉之

蔡向隱真宮詩福地流傳號隱真麻姑曾款蔡翁門曰春雲子自堪饌井

益丹泉便可吞山露五峯疑指爪溪盤百疊  
想裙痕我來既躡靈蹤後知是仙家幾代孫

凝真宮

仙居縣志在縣東南括蒼洞唐天寶七年

有慶雲覆洞因建宮焉宋天禧二年賜額光宗書  
瓊章寶藏賜道士陳會真鎮之宣和燬建炎元年  
重建

紫虛觀

台州府志在縣南一百步元至治間道士

吳初隱建

寧海縣

妙相寺 寧海縣志在治東三百步為祝釐之所赤

城志梁天監元年建隋大業中廢唐乾元元年徙

今地吳越寶正三年改海晏宋大中祥符元年改

今額台州府志寺久廢明崇禎九年僧慧丈十六

年僧正諦先後重建

寺有錫爐係建文三年鑄上  
錫典史魏澤名魏公以刑部

尚書謫官保全  
方正學遺孤

宗教寺 嘉靖浙江通志在縣治西二里赤城志舊

名清泉梁天監四年建隋大業元年廢唐乾元元

年徙今地會昌中廢大中元年復建宋大中祥符

改今額寧海縣志寺塔下石碑二

王璞重修崇教寺碑記寧海清

泉山有崇教寺為邑令祝釐之所久廢勿葺知縣事汾水王侯士弘擇住持之嚴於戒律者委以興理之事按寺梁天監四年建在邑北去縣二十里許曰崇教院唐貞觀間以不便祈謁因徙今地至賢禪師始宏廓之改院為寺元大德壬寅闍僧文泉始重建自是梵衆雲集有大叢林氣象及後寇興昔所建立皆蕩然無遺洪武八年王乃召父老議鳩工衆以春山對春山即領寺事發已橐募衆施始崇塔終大殿次第就績百廢具舉蓋期歲之間而清泉之舊復矣因叙顛末以紀歲月洪武九年丙辰四月八日台州府志寺舊有筠軒及清泉亭

宋奎光遊

崇教寺詩山氣含秋爽溪聲漱碧痕如何煙莽徑  
云是舊祇園老衲栖神定顏軒倚竹存碑趺探往

勝摹古

剔雲根

國朝順治八年僧照忍重建

壽寧寺 萬厯寧海縣志在縣東一十里赤城志舊

名白水菴晉義熙元年僧曇猷建時猷自海乘槎

至卓錫泉湧故以為名宋淳化元年改今額

門外有猷

所鐫石高數尺許石上有紹聖中高迷陳安道以  
下題名其西三十步有洗腸井其水白色旱澇不

損益太宗曾遣內侍裴愈手  
御書三十軸以賜後多散逸

台州府志元明興廢

無攷

國朝康熙八年僧照忍重興

丹丘寺 赤城志在縣南九十里宋元嘉二年梅長者捨所居菴而建以其誦經感丹鳳賜名丹丘靈鳳宋大中祥符賜今額台州府志後修建無攷

國朝順治中僧實際重興

慈雲寺 台州府志在縣西二十里舊名齊雲唐咸通三年建宋治平三年改今額

瑞相寺

寧海縣志在縣東南梅枝赤城志唐貞觀

二年建吳越時葉太傅景泰捨基闢之宋治平三

年賜額

廣潤寺

赤城志在縣西南五十里舊名普濟晉僧

曇猷建宋大中祥符間改今額台州府志明景泰

間僧休菴重建崇禎間了悟增廓之

國朝順治間僧自融重建木陳師道恣居此

玉溪寺

台州府志在縣東南八十里舊名湫水唐



元和五年以湫水潭應禱而建宋大中祥符元年  
賜今額後圯明崇禎間僧如受重建

國朝順治六年僧照心建法堂改置龍王殿

興梵寺 赤城志在縣南五十里舊名興國開寶中

建治平三年改今額

法安寺 台州府志在縣東七十里宋淳熙三年建

國朝順治十八年遷遣寺燬康熙九年展復僧照忍重

興

福興寺

台州府志在縣東南十里舊名福全宋開

寶中建後興廢無考明崇禎辛未僧慧文真亮重

建

崇福寺

台州府志在縣西南二十五里梁王山俗

呼梁王寺舊名資福唐武德中建宋大中祥符中

改今額元祐四年僧懷智造藏殿提刑羅適為記

明季僧澄初重修

慈勝寺

台州府志在縣西南六十里唐景德間建

名慈安宋治平三年改今額

國朝順治十八年奉遣寺廢康熙九年展復重興

仙源觀 寧海縣志在縣南十四都元至元中建

玄妙觀 台州府志在躍龍山東

太平縣

明因寺 太平縣志在縣南隅唐咸通五年建舊名

靈泉宋祥符元年改今額

梵興寺 赤城志在縣東南一百二十里舊名法興

梁貞明元年建宋治平三年改今額

明覺寺 台州府志在第六都舊名崇國俗呼雪山寺唐大中二年建僧智顓常飛錫於此宋太平興國二年改名應龍治平三年改今名

威神寺 赤城志在縣南四十里舊名靈湫唐乾寧三年建宋治平三年改今額寺後厓壁峭立有瀑布及鄭公亭

松巖寺 太平縣志在縣西北松巖山上元至正間

僧秋月建初名水月禪院後賜今額明洪武間歸

併澄照講寺正德初釋永盛重建松巖堂

高村松巖寺詩

絕壁迴巖不計層穿雲踏雪冒寒行每驚虎卧怪石出忽訝龍蟠老樹橫亂響流從千澗落杳無人

際一僧迎此身不是神仙骨那得雲山有宿盟

金仙寺 台州府志在桃溪華蓋山下唐天寶九年

僧子鴻建名仙巖宋治平三年改今額

護法寺 太平縣志舊在鳳城山唐大順二年建一

日扣鐘不鳴里人聞聲在天王山下因徙焉治平

三年賜額俗呼天王寺

崇國寺 台州府志在九都晉咸和中閩僧睹異光  
發林壑因建寺名普光宋祥符元年重建後圯明  
永樂七年僧可原重建

祇園寺 台州府志在十都晉天福間建名瑞峯即  
神祿禪師道場吳越時改今額

靈山寺 台州府志在玉環鄉晉天福二年僧啓奩  
聞山南鐘聲至其處以石捍潮初刹宋熙寧元年

僧咸築塗成田七頃遂賜今額

普福寺 台州府志在一都錦屏山明萬厯間建

國朝順治十三年僧照燧復修

天真宮 台州府志在塘下元時南塘真人張惟一

建

金華府

金華縣  
附郭

天寧寺 嘉靖浙江通志在府城內宋大中祥符間

建面對溪山舊有石浮屠可以盡覽一郡之勝萬

歷金華府志舊名大藏院今稱天寧寺

密印寺 萬歷金華府志在府治西北五十步舊名

永福吳越錢氏建宋大中祥符間更名密印後廢  
改建分司寺有塔九級屹峙雲際治平初復建明  
隆慶初重修

國朝康熙十五年康熙王臨郡僧牧菴募修寶塔煥然  
一新十六年創建房宇方丈暨廊廡等內供奉全

部藏經



報恩寺 金華縣志在縣東唐乾符間陳姓捨宅為

曉晤禪師道場

國朝順治十年僧圓應重建大殿

法隆寺 名勝志在通濟橋南寺前經幢高五丈刻

云唐大中十一年立幢下石隙周匝有大金錢徑  
二寸許以杖舉之宛轉其中竟莫之得俗呼金錢  
寺金華縣志年久圯僅存故址

國朝康熙十八年僧元傑重建

無相寺 金華縣志在通遠門內宋紹興十一年建  
後燬元泰定間重建大殿

國朝順治十年僧大乘鼎新之

七寶寺 金華府志在天王門內古剎明嘉靖三十  
年為有力者所占

國朝順治九年僧綱海朗募贖舊址重建

寶婺觀 名勝志在子城西南隅隋平陳太史以其  
地當婺女乃立祠於城西北隅唐開元中徙其像

於開元觀五代時刺史錢儼始移今所明一統志  
宋淳熙間賜額方輿勝覽與州學連接樓宇高聳  
古桐森然諺云桐齊簷出狀元宋紹興癸丑陳亮  
嘉定庚辰劉渭皆為大魁應前識云金華府志明

洪武五年重建

宋瀛重建寶發觀碑記觀祠發女  
星始作於唐武德四年初在郡城

西北吳越時刺史錢儼徙於子城上西南陝宋淳  
熙十三年以知州事洪邁請賜今額元毀於火者  
再皆官作之洪武五年秋觀復災主觀道士楊道  
可乃持厯走境內告於衆庶各出資泉相厥事作  
正殿五楹重閣三間殿與閣之中構為飛亭若齋  
居賓館之屬各以次就緒而星之像未具先是杭

欽定四庫全書

卷二百三十二

州衛都指揮使徐君司馬嘗出鎮於發屢邀靈於  
星祠其在杭也夢有所見因命斲沉香木為像名  
其閣曰靈華而奉像置其上工始於災之明年越  
六春秋至十二年冬始成於是道可持幣走告於  
瀛曰發以星名州星之澤州民者甚大宋宣和三  
年方臘反睦將陷郡統領劉光世討之兵次蘭溪  
未敢進夢霞冠羽衣神趣之行且以病指告劉至  
盜黨就擒及謁星君祠其像如夢中一指將墜開  
禧三年大水先期告守土吏為備民不漂溺景定  
四年武義山寇為亂來犯城屯於溪南遇媼驚履  
長數尺盜怪問之媼曰域中人履皆若是耳盜驚  
散去元至元十三年郡既降復守元將高興怒欲  
屠城夢神諭以勿殺明日以火矢射觀矢逐墮軍  
中見巨人坐城上濯足城南水中大駭遂下令風  
民降不敢戮一人至正十六年沿海翼兵自蘭溪  
夜叛還謀襲郡城神化婦人導叛兵食瓜田中食

已皆昏迷失道至城而天已曙官兵有備遂伏誅  
此皆彰灼可徵之大者而疾癘旱潦之禱為尤驗  
固未易悉數也今觀事幸復乎故皆神靈  
之所致願并識之因如其請而為之記  
隆慶間

燬萬厯間郡守曾如春盧奇前後重建

國朝順治二年燬郡守夏之中重建星君樓後壞郡守

張蓋又建

金華縣

城外  
寺觀

西峯寺 金華縣志在迎恩門外亡初始年月宋至

和初立西峯和尚像西峯名清素自五臺飛錫名

山唐天復中至徽州祁門縣之西峯山後至此故  
建像焉明萬厯丙午大殿將傾郡丞袁世振重建  
郡守周延光又建觀音閣

國朝康熙二十一年僧普正重修

智者寺 方輿勝覽智者禪師道場後倚石巖乃金  
華第一刹也萬厯金華府志在縣北十五里梁武  
帝召樓約受戒號智者國師辭還適谷口見白氣  
浮空曰茲地當興三寶普通間勅造智者禪寺金

華縣志寺久廢邑令江可受重構

謝翺智者寺詩  
流水北山北笑

蒼岑影長看花春到寺數竹午過廊厓石侵衣碧  
山雲沐髮香老僧呈佛骨見畢下匡床許謙遊智  
者寺詩風日影颼颼松陰繫紫駒白雲千載寺黃  
葉四山秋地勝樓臺接林深虎豹遊人生自可樂

此外復何求

石佛寺 萬厯金華府志在縣東北四十里舊名赤

松巖寺梁大同間僧道瓊止於山南聞金石讚唄  
之音緣巖而上見琢成大石佛一軀高可六丈跌  
坐儼然因建寺有鐵羅漢五百一十八尊宋改今

額

鹿田寺

金華府志在縣北三十里名勝志鹿田峯

有東西二寺即舊寶福院明萬厯間郡守張朝瑞

重建其後最高處為望西亭

葉謹翁鹿田寺詩憶昨招提宿空山日欲

曠僧窻聽盡雨焦路踏翻雲林甕松花釀  
茶泉竹簍分因君成勝踐飛瀑夢中間

國朝康熙十年僧寶相重修

普明寺 金華府志縣東六十里梁普通七年勅建

唐廣明間重興



國朝康熙十八年僧啓明重建大殿併禪堂方丈四壁  
懸厓玉屏前列法華後聳最為清曠

寶華寺 明一統志在縣南三十里舊名元覺唐景  
福間僧法朗建

祥符寺 嘉靖金華縣志在縣治東南晉義熙八年  
建號曰法幢唐武后時改為大雲宋大中祥符間  
改今額金華府志寺有定光古佛真蹟見存

國朝順治十三年寺僧寶閣重修并建精舍

無量寺 金華府志在縣東六十里梁時勅建代有

興圯

國朝順治十二年僧明遠重建

積道院 金華縣志在縣南三十五里覆釜山相傳  
定光佛於此成道亦婺中三佛地之一

國朝康熙九年僧慈能重建大殿僧房百餘間

寶相寺 金華縣志在十二都舊名靈石後有雙峯

巖中湧出大石佛七軀吳越錢氏鑿而取去今遺

蹟存焉

大慈寺

金華縣志在十一都即盤龍寺宋延平中

改今額

靈巖寺

金華縣志在二十五都地名新建唐時趙

州師有弟二人一沐塵一新建遊金華南山寶華  
而新建住錫於此遂名其地為新建

國朝順治六年天台僧履中顯卜寺東北里許重立殿  
宇時稱為新靈巖

定一寺

金華縣志在縣南二十里舊名定業宋淳

祐八年建後圯明萬厯間住僧大璘重建

妙法院

金華縣志在二十五都晉天福間僧道密

自天台來結菴南山絕頂有光自口出成白蓮花  
日啖草根野藪惟誦法華經里人捐地建刹郡上  
其事賜名妙法

國清院

金華縣志在城南二十里久廢

國朝康熙元年僧可訥重建

淨刹菴 金華府志在縣東北四十里名勝志唐元  
和間建舊名東巖

雲仍菴 金華縣志在縣東二十里

國朝康熙二十年僧妙元建

祇樹菴 金華縣志在三十都

國朝順治間僧定初刱建

法華菴 金華縣志在三十二都

國朝康熙十年僧象化鼎建

七佛堂

金華縣志在赤松門外浮橋北莫詳朔始

年久廢

國朝康熙二十二年僧本無重建

寶積觀

萬厯金華府志在縣東北二十里赤松山

志寶積觀即赤松宮按觀碑二皇君因赤松子傳

授以道而得仙邦人遂建赤松宮宋大中祥符元

年始改今額金華雜記舊宮殿庭宇廊廡甚盛為

江南道宮之冠後錢武肅王重修東有二仙祠南

有卧羊山嘉靖金華縣志明成化戊戌道紀余永

富復建金華府志萬厯十年縣令汪可受重建

范

遊赤松觀詩靈祠丹井餘真跡祠下老松森百尺  
仙子騎鯨去不歸痴人猶問山中石陳叔祿寶積  
觀詩斷厓千尺削芙蓉望裏樓臺十二重蠟屐破  
雲羊不起瑤笙歸路鶴無踪橋如圯上思黃石仙  
始人間見赤松莫訝塵寰  
留信宿還應辟穀此相從

崇道觀 金華縣志在二都赤松澗

貞元觀 金華縣志在二十都

蘭谿縣

聖壽教寺 正德蘭谿縣志在縣東南一百三十五

步梁大同間建舊名招賢宋祥符中更名聖壽

文峯崇惠禪寺 舊浙江通志在縣南二十里地名

大經塢奇秀天設羣巒環拱

國朝順治中里人郭爾儒延僧樵之淨玉開山

棲真寺 金華府志在縣東二十里銅山鄉後唐長

興間有僧建石關寺於桐山舊名靈洞宋祥符中

改額明萬厯間重建改棲真



寶惠教寺 萬厯金華府志在武昌鄉十都梁大同

二年建舊名涼泉唐咸通間改延慶宋祥符中改

今額

范浚寓寶惠寺喜晴登山詩喜霽出拾提愛山登業茂林端已殘照路草猶半濕丹崖斷

雲歸翠竇飛泉入長天沒鳥影遠水動虹吸塵襟得延瞰爽氣橫來集欲逐野僧還更看空翠立

昭化寺 正德蘭溪縣志在縣東紫巖鄉舊名昭明

周顯德初建後有僧仲清道淵相繼修葺寺以不

廢

杜旂昭化寺記昭化初自周顯德間歲久頽圯僧道淵慨然欲新之有力者為乞於部於州俾

以甲乙領寺事遂與其弟子祖景剪荆榛掃狐兔而棟宇之淵死聚囊乃苦志策勵起舊創新自紹

定辛丑至嘉熙之戊戌千佛閣落成下闢法堂旁  
開大室約費錢六千餘緡以彼佛言之淵善創可  
自附於開山之鼻祖以吾儒言之聚善繼可  
無忝於肯堂之冢嗣矣淳祐三年七月記

顯教禪寺 金華府志在縣西五里蘭陰山之麓宋

天禧三年建

明因教院 正德蘭溪縣志在瑞山鄉西巖舊名石

佛唐貞觀中建宋治平初改今額

于石明因院詩  
丹崖翠壁數千

尺絕頂僧房三四間老樹倚  
巖巖倚屋白雲飛去又飛還

無垢教院 蘭溪縣志在瑞山鄉舊名杜巖唐中和

二年建宋治平中改今額

章光大無垢院記蘭溪之西曰瑞鄉去縣三十

五里有古刹曰無垢父老遽傳居士杜函捨所居為寺有巖深廣可三十丈曠濶明靜中有井曰夢泉方僅五尺四圍皆石水常不竭夏冷而冬溫修竹喬松森陰蔽日有水從北流而南清泚如藍縈遠如帶無一點塵俗氣尋幽好奇之士多指此寺為勝地云

兜率禪寺

蘭谿縣志在太平鄉晉大傅胡鳳建初

名和安宋祥符初改額唐詩僧貫休道場也

于石兜率

寺詩錢塘一剎倚霜寒萬水千山蜀道難瓶鉢生涯在何處秋風松子落詩壇

浩然觀

正德蘭溪縣志在縣東一里二百二十步

唐時建舊名靈瑞宋治平中改今名舊浙江通志

相傳白衣真人修鍊之地

吳師道浩然觀分韻詩過雨秋正佳出郭山漸

好松門表靈宮石澗緣細道空壇故葉積深殿陰色早丹遺井水香仙去庭柘老伊昔崇真元構祠始天寶靈風却縹塵金幢飛翠葆猶餘千年像遂走羣吏禱我生無俗情道妙窮探討天根息綿綿虛白生浩浩永懷潔身私非關恨枯槁緬邈竇鵲期空山動秋草

東陽縣

新安教寺 明一統志在縣東一里六十步唐咸通

間建金華雜記寺前有池方數頃僧畜魚其中傍

有大樹偃池上東陽縣志元大德間僧道存募建  
藏經閣明永樂間僧宗源募建鐘樓

國朝順治己丑僧大琳重建大殿

法界寺 金華府志在縣西一百四十步舊名華嚴

宋乾德初建東陽縣志祥符中易今名明圮

國朝僧海華等重建

灌頂寺 東陽縣志在縣南三十里舊名甘泉為教

院晉開運三年厲刺史捨宅建大中祥符元年改

今額四十六都

靈雲寺 金華府志在縣西南七十里唐咸通八年

建東陽縣志宋嘉熙丁酉里人陳紹年重建

周仲虎靈

雲寺記距邑南六十五里有佛刹曰靈雲攷碑石遺文蓋唐咸通時天台有行僧過此開山造院至

此不知凡幾歷歲月墓成邱墟荒谷矣然其地僻而徑幽山靜而塵絕野芳歷亂茂樹陰翳清人遊士接踵不絕會陳公紹年清隱林泉與其居處相近見谷中地畧然而墳起叩諸山間樵牧曰此古

靈雲寺基也及登山巔公慨然曰古者建道場以說法亦轉移人心之一助茲既荒落吾當修復遂

召比丘邱大虛等鳩工庀材經始於嘉熙丁酉十二月十二日訖工於淳祐辛丑之孟秋棟宇翬飛丹

黃掩映蓮花生澁貝葉翻  
經號曰靈雲固其宜哉

明嘉靖間重修

雲峯寺 東陽縣志在縣南五十里唐景福六年建

寺前兩石對峙山後雙瀑合流舊名靈巖宋治平

二年改今額

法輪寺 東陽縣志在縣西南八里唐乾符三年建

號寬峯禪院宋祥符元年勅賜今額至道咸平間

重修

胡則重修法輪院記婺州東陽縣寬峯峭怪逾數千仞飛泉激越散作清涼爰有神僧環

草而處猛獸馴擾常護左右居人瞻仰罔知名號擅越章鐸躬訪靈蹤深加諦信遂崇法宇以廣金

田唐乾符三載丙寅締建既圓誠請於上以峯名  
為額星霜暗易縉流屢更神宗太平興國八年本  
縣傳法僧義修持邑宰之命恭召金華山智者寺  
重禮上人主領之上人餘杭人也潔白僧行檀信  
親附於是重建法堂次崇厠庫高大其門嚴淨其  
室至道元年乙未始就復有邑信士胡細厲就同  
誓淨緣營立釋迦尊殿咸平五年壬寅告畢輪奐  
相宣金碧交映大中祥符元年詔改院為法輪院  
善矣哉郡邑改觀道俗增信  
植福之地垂於無窮者也

靈嶽寺 東陽縣志在縣南十八里梁大同二年建

寺有尊勝寶塔一座內刻諸品經文

國朝順治間僧仁陞請龍藏真經入寺康熙十七年重



修

禪林院 東陽縣志在縣東東白山中唐太和六年

建曰教院宋宣和中燬建炎二年稠公大師重建

張志遠重建大殿記襟山帶水峇嶺衍迤修竹茂  
林折栢病檜高森映蔽三伏之間不知有炎蒸氣  
殆非人世間所有也

國朝順治間僧衆重建法堂

元寶觀 萬厯金華府志在縣南四十里齊中興二

年邑人陳元寶捨宅建宋天禧間改今名東陽縣

志紹興四年元寶之裔嚴重建

徐端益元寶觀碑記宣和庚子冬賊

發姦之清溪東陽之民部其民以自保者凡三四  
嚴之所保其一也嚴婦之父張煒避寇入山遇神  
人曰往語爾等必欲破賊宜新所謂北極殿者嚴  
聞亟部所轄詣廢殿命黃冠普師如神戒未幾大  
破賊賊平乃鳩工集材而成之肇作於紹興甲寅  
之冬而落成於乙卯之春棟楹隆壯甍瓦精密丹  
雘既新象塑咸設燦然一新良未易也

乾元宮 金華府志在縣西二里宋紹興二十五年

建

義烏縣

寶林禪寺 嘉靖浙江通志在雲黃山下古殿傑閣

甲於東州名勝志蕭梁時邑有傅大士少以漁為業嵩頭陀語之曰爾彌勒化身也因令鑑於水乃悟前因問以修道地方頭陀指松山雙檣木曰此可矣遂於此行法忽有黃雲如蓋盤旋其上後人因名松山曰雲黃山事聞於朝大通三年勅建寺於雙檣間即今雙林寺也金華府志宋治平二年賜今額宣和三年燬紹興四年東陽賈廷佐首為

鑄鐘建藏殿住僧行標以來六傳次第復完

潘良貴重

修寶林寺記有大比丘其名行標號曰慧炬柱錫雲黃山大開法席徧召檀那而告之曰永惟大士誕育此方為瑞為祥人天共仰雙檮建寺甲於叢林自梁迄今逾六百載流通祖道代不乏人宣和三年盜起新定不幸燬燼一椽不存今歷歲時堂廡齋厨粗成行列獨茲殿址瓦礫弗治妙相慈容久無所宅爾等善士忍坐眠耶衆聞標語歡喜踴躍大出金錢合而計之餘五十萬以紹興二年春經始三年冬告成中妥像設莊嚴妙好外繚闌栢雄麗靚深山林增輝緇衲雲集變荆榛為金碧古未有成結大緣如是之速者也故記之以俟來者楊傑寶林寺詩山路崎嶇山頂平兜羅雲向下方生了知大士夢中夢明末燬要去如來行處行

國朝康熙七年重建

智度教寺 萬厯金華府志在縣西四十里唐智忍

禪師修行之地大順二年僧彥休過此建院曰卧  
雲吳越錢元懿為婺州刺史建殿落成五色雲見  
因名五雲宋大中祥符間賜額智度院後改寺

國朝雍正四年僧遠賁重建大殿廊舍

隆平教寺 金華府志在縣東二十里後唐長興間

建舊名保寧宋大中祥符間賜額喬行簡書勅賜

隆平寺崇禎義烏縣志尋廢明永樂四年里人吳彥清重修今為教寺

聖壽禪寺 萬厯金華府志在縣西四十里舊名龍

壽宋治平間賜額後廢元至正元年重建

黃潛聖壽寺碑

記聖壽禪寺宋大觀間更為十方禪寺歲久弗葺敗屋數楹不蔽風雨泰定二年秋千巖禪師來自錢塘愛其尚巖秀潤泉清水深始度隙地結茅而駐錫焉緇素之侶嚮風室集座下者恒數千百人至無以容其居給其食僧法聰德超慨然出山叩諸有力而好事者合衆緣以成之規制之廣視昔有加禪師為而不有擇禪林中德行完潔者俾之主持承其付託者亦能負荷而無所係吝不久輒

謝事而退自懷空成公建今繼公已七傳矣繼謂予曰在吾教中聚沙積土無非佛事法施時施寧有差別請為我並誌之因撫其所述而悉著之使刻石焉 洪武間重修

來山寺 義烏縣志在縣西南二十八都名勝志梁

天監中西域嵩頭陀自香山南行至金山江水大溢舟師莫肯載師布繖水上持鐵魚磬截流而濟至來山立精舍曰來山寺

華陽教寺 崇禎義烏縣志在縣東華陽山唐法輪大師卓菴之地舊名永安洪武二十四年改今額

元真道院 義烏縣志縣南青巖山中元至正初里

人俞士亨建

永康縣

上封寺 萬厯金華府志在縣東北百步舊名光義  
晉天福間建元至元初燬僧景傳重建永康縣志  
萬厯十年廢徐宗祥輸價仍捨為寺

大通寺 永康縣志在縣東北六十里舊名翠峯梁

大同四年建金華府志宋大中祥符元年改今額



金仙寺 永康縣志在縣東一百一十里舊名仙山

唐咸通二年建地名鹿蔥金華府志宋治平二年  
改額後燬明洪武初重建

澄心寺 金華府志縣東北四十五里唐光啓間建  
名九洩宋大中祥符元年改額明洪武間重建

延慶寺 萬厯金華府志在縣西北四十里舊名金  
峯唐天祐間建宋大中祥符元年更名延慶

普濟寺 永康縣志在縣西北四十五里舊名清泉

吳越寶大元年建地名柳村萬厯金華府志宋治平二年改今額咸淳間重建

延真觀

嘉靖浙江通志在縣東南舊名寶林金華

府志梁大同元年建宋大中祥符間改今額

續神仙傳

道士馬自然至觀前指松樹曰此松已三千年矣當化為石至夕大風雨其松果化近觀松皆化為

石嘉泰間立亭於旁名松石元至正間復建

紫霄觀、永康縣志在縣東三十里舊名招仙梁大

同二年建宋大中祥符元年易今地名芝英

胡則

紫霄觀詩綺霄重疊武陵溪  
鷺嶺相將路不迷白石洞中人乍到  
碧桃花下馬頻嘶深傾玉液琴聲  
細旋煮胡麻月色低猶恨此身閒未  
得好同劉阮灌芝畦

### 武義縣

法雲教寺 嘉靖武義縣在縣西一里宋大中祥符

元年建

惠安禪寺 萬厯金華府志在縣東一十五里舊名  
明招其地乃晉阮孚故宅嘉靖武義縣志宋建炎  
南渡呂氏自太師而下皆葬明招山後請為功德

院額曰元淨惠安

慈尊禪寺 嘉靖武義縣志在縣東北二十里舊名

東臺宋開寶元年建大中祥符二年改今名金華

府志寺有五景捫星閣凝冰池漱玉澗埋雲塢長

青松今名山坑寺

唐愈賢慈尊寺詩野寺山深五月秋杜鵑啼雨隔煙樓三年浪

跡空衢路慚愧僧房半日留沈杰慈尊寺詩細雨霏霏點落花白雲勾引到僧家導師知我三衢主

不問姓名  
先煮茶

中峯教寺 武義縣志在縣北二里宋宗丞趙汝喙

建金華府志元至正六年改今名

無碍寺 武義縣志在縣西二十五里周顯德五年

建元泰定二年修明隆慶元年重建

乾光霽無碍寺詩雨霽苔

痕濕未乾滿堦春草翠雲團長吟  
自愛禪居靜梵殿月來松影寒

南龍華寺 金華府志在一都南山明成化十一年

建萬歷二十年重修

廣福觀 嘉靖浙江通志在縣西三十里宋治平中

賜名壽聖尋改今名

浦江縣

左溪講寺 萬歷金華府志在縣東二十三里舊名  
普安院唐左溪大師法朗道場也宋開寶間更新  
請額曰雙溪浦江縣志明洪武二十四年改今額  
歸併各寺為叢林

大智教寺 崇禎浦江縣志在縣北二里舊名淨居  
尼寺宋崇寧四年更為僧寺治平二年改今名浦  
江縣志明萬歷三十一年移建小東門外

國朝康熙六年重建大殿

龍德教寺

嘉靖浙江通志在龍峯山下宋寧宗御

書額金華府志舊名乾元初始無攷元大德間重

建有塔在龍峯山上明洪武十三年修

宋瀛重建龍德大殿

碑記龍德寺法環禪師道場初名乾元宋大中祥符元年更今名嘉定中寧宗親書寺額以賜之寺無碑碣可徵不知何時建立但乾元乃唐肅宗紀年以年名寺其殆或肇於唐歟寺廢將圯元大德九年住持僧善興悲撤其舊而新之元末燬寺之二比丘至德守約乃合謀曰前人之功不可不繼也而力未能徧及宜先其大者以為衆倡於是絀衣縮食重砌大殿五楹經始於洪武九年之六

月落成於十三年之三月後廢萬曆十七年重建

明德教寺 崇禎浦江縣志在縣西四十五里其緣起不可攷宋治平二年改今額明洪武二十四年歸併各寺僧立成叢林

白佛寺 金華府志在縣南一里宋乾德元年建舊名慈相教院

聖昌教寺 浦江縣志在縣南四里舊名唐昌尼寺宋大觀二年更為僧寺治平二年改今額元至正



四年僧紹隆重建

保安教寺 崇禎浦江縣志在縣南八里晉天福八

年縣人倪盈捨地建號曰保安宋治平二年更名

淨慧院延祐六年僧一雲重建明洪武二十四年

更今名

官巖教寺 宋濂官巖院碑記在縣東南康侯山又

曰官巖山梁大同間比丘尼元淨始建院唐會昌  
之季燬咸通初祖燈大師自越之上虞飛錫而來

遂縛禪巖內會歲旱獨上絕頂祈請捐身投巖下  
而卒俄頃大雨火化得五色舍利民感之就巖之  
西為建今院八年丁亥因山賜額為官巖云浦江  
縣志宋景定三年妙定大師智印重建

太極宮 萬厯金華府志在縣東南宋嘉定間建元

至大間重修

張孟無太極宮記浦江縣治東南不  
百步有宮曰太極宋嘉定乙亥間知

縣錫山尤君華以邑祝釐請禱之事遠詣廣福觀  
觀在仙華山下去縣十餘里許非便謀創此宮前  
建三清殿後敞層閣以祀星君廊廡翼如重門外  
闕觀者欣豫莫不起敬遂聞於朝廷仙華舊額揭

焉至正戊戌宮燬道士王無為乃鉢累寸積明年  
建三清殿又明年建門臺亡何仙去其徒玉洞觀  
圖終先志復建東西廡既而庖庫諸室皆成凡其  
教之所宜有者嚴奉靡不如式飛甍偉棟金碧交  
輝視舊蓋有加矣

金華府志明崇禎九年燬知縣吳應台  
建

國朝康熙十年知縣毛文埜重修

湯溪縣

九峯教寺 金華府志在縣南九峯山下梁天監間

嵩頭陀卓錫於此寺有三賢堂祀龍丘萇徐伯貞

徐安珍

無垢寺 湯溪縣志在縣東南三十里有石巖因為  
佛殿唐乾符三年建

延興教寺 湯溪縣志在縣西二十里梁天監二年  
建

證果禪寺 萬厯金華府志在縣西北十五里梁天  
監間達摩禪師開基唐貞觀元年建元至正間寺  
僧處仁重建有僧鑿井於佛殿東角二十步深三

十尺得古銅鉢孟上有覺地二字因以名其室寺

有宋濂書額尚在

胡宗證果寺詩永安山水古叢林破袖傳來幾代深滿地白雲

離俗迹半庭黃葉伴僧吟簷頭鳥雀窺香飯潭下魚龍聽梵音莫道空門忘百慮九年面壁亦留心

西竺教菴 湯溪縣志在縣西十里元延祐二年建

宋約西竺菴詩名傳西竺古招提幾度來遊駐馬蹄  
牕外清風千個竹門前流水一灣溪長廊晝靜無人到  
古塔年深有鶴棲入定老僧應已久袈裟恐浣燕巢泥

寶興寺 金華府志在縣北十三里元大德間僧仁

壽重建吳師道有碑記

治平寺 金華府志在縣南八里前有一峯峻立名  
卓天峯明宣德間建

崇仙宮 萬厯金華府志在縣西十里梁大同二年

蘇府君建招接十方仙道之所道士鄴去奢來居

未幾去處於茅山得道上昇

宋約崇仙宮詩白雲滿地護蒼苔路杳玄

關少客來仙去已無丹竈在壇空惟有碧桃開石間寶劍飛應久天上飈輪去不回安得借騎珠樹

鶴相尋我亦到蓬萊

浙江通志卷二百三十二

欽定四庫全書

史部

浙江通志卷二百三十五  
三至

詳校官給事中臣戴璐

檢討<sub>臣</sub>德生覆勘

總校官編修<sub>臣</sub>倉聖脉

校對官中書<sub>臣</sub>石瀉翥

謄錄監生<sub>臣</sub>包文訓

欽定四庫全書

浙江通志卷二百三十三

寺觀八

衢州府

西安縣  
附郭

大中祥符禪寺 嘉靖浙江通志在府治西北太平

寰宇記吳將軍鄭平捨宅建弘治衢州府志梁天

監三年額曰鄭覺唐神龍間改龍興宋大中祥符

初改今名宣和間重建佛殿元至元十一年燬二



十五年僧文衡建法堂大德六年嗣曇建大雄殿

泰定二年杭淨慈寺僧義山主席完飾殿堂塑繪

佛像

黃潛修祥符寺記衢之祥符舊傳吳將軍鄭公平年九十有三捨所居為寺其逮元已不

啻千載中間厯幾廢興皆無所於攷由至元丙子兵燹之餘龍象散亡人天推慕者又五十年於此矣泰定乙丑義山來主茲寺慨焉以興復為已任因前人所作三門大殿加蓋瓦級甃而髹彤藻繡之造佛菩薩神像十有一軀荆東西廡寶塔珍臺煥焉畢新室堂庖福繕治以次以七載之勤成就如是而不敢遽以為足謀所以崇役之未已也其徒咸共慶幸俾來屬晉書其所欲道者如此

西安縣志明洪武十三年僧淨乾葺鐘樓十五年

設僧綱司嘉靖七年火止存荒址改為西安縣學  
其兩旁牆外隙地量與僧居改為祥符寺萬厯年  
間郡守易公愷之重修其後日久傾圮

國朝康熙三十年僧本修募建正殿三十五年又建天  
王殿重修後殿靜室三十七年建山門巍煥如故  
天寧萬壽禪寺 弘治衢州府志在府治西梁天監  
三年臥雲禪師初名吉祥唐玄宗朝改開元宋改  
報恩光孝寺復易崇寧未幾賜今額明洪武十六

年建大雄殿永樂元年僧道永遷殿宇西南向崇  
禎衢州府志正德元年燬先有金華定光古佛坐  
化於此真身漆布祈禱有應及火厥體巍然獨存  
西安縣志天啟丙寅郡守舒崇功知縣賀康載邑  
紳方應祥等捐資建正殿崇禎己巳郡守蔡三復  
等重建天王殿有蜀僧大德來主寺建後殿佛閣  
國朝康熙四十年殿災住僧勤生募建

西安縣

城外  
寺觀

南禪顯聖寺 弘治衢州府志在城南三里梁天監

年間嵩頭陀建舊名鎮境宋至道元年建水陸道  
場感夢熙陵御筆改今名趙抃在朝時有僧廣教  
來主其寺公送以詩云到日參徒耳目新桃花一  
笑已中春吾今告老還家近亦是柯峯自在人寺  
之圓西隣大溪公作亭其上扁曰觀瀾其寺有瑞  
石將軍祠靈應特異

國朝康熙四十八年衢州總兵官李乾龍捐資重建置

田百畝

藥師寺 衢州府志在城西二十里梁天監三年建

程秀民藥師寺記寺據郡上流為一方之鎮其廢興靡常元末熸明洪武間僧妙法創復再火於成化正德寺之殿宇旋修旋毀竟無完美嘉靖癸未會昌侯孫公果銜命過衢憩於寺慨然捨金丙午郡守楊公子仁捐俸命僧道嵩任其事告於四方有鄭君曰鍾曰鯉曰湧者傾貲以主緣乃於東隅造樓三間高三層約七十尺上懸巨鍾聲聞十里工始於嘉靖戊申十二月明年冬訖工予因道嵩之請而記其歲月

湧泉寺 西安縣志在城西北二十五里晉天福間

建後燬明洪武初重建寺有泉於平地湧出如酌  
突虎跑狀冬夏不竭溉田十餘里

花塢寺 西安縣志在城西二十五里地多桃李春  
明日為遊觀之所土人於塢中時聞鐘鼓聲因而  
建寺

國朝順治間僧型山說法於此

故城寺 崇禎衢州府志在城南亨衢鄉乾德二年  
建相傳為殷浩故宅

明教寺 衢州府志在城北二十里宋太平興國元年谷口鄭永等建

國朝康熙二十一年僧慧雲重建

資忠顯親禪寺 衢州府志在城西北三十五里勝堂源宋熙寧間樞密何公建功德院久廢

國朝康熙三十一年天寧寺僧勤生重建

乾明寺 衢州府志在城南三十五里舊名開明禪院宋端拱元年改乾明寺程俱有記

明果禪寺 衢州府志唐建內有傳法堂白居易為

記

開元寺 衢州府志在城東南十五里唐神龍元年

建開元初改今名明季燬

國朝順治間重建

蓮花寺 西安縣志在城北四十里蓮花池上弘治

衢州府志宋建隆中建

國朝康熙五年雲間僧乾敏來宿發願建石橋於此橋



下為放生池寺後園中有湧泉一泓即其蹟也

法光寺 弘治衢州府志在城西南六十五里唐會

昌元年建

鄭吉士法光寺詩蕭寂松關路門前負  
手行亂峯含雨氣古湫走泉聲樵徑霜

林暝僧房夜火明草牀  
聊寄宿簷溜滴殘更

轉輪禪菴 舊浙江通志在青峒峯金華聖者轉輪

處也方應祥增築倚雲山房與徐日久讀書其中

光嚴寺 衢州府志城東四十里清平鄉周廣順間

建

三藏寺

衢州府志城東四十里舊名淨刹梁僧崇

禪師建

能仁寺

衢州府志城南德懋鄉唐政和間賜額

地藏寺

衢州府志上寺在城西三十五里石晉開

運二年建下寺在城西五里漢乾祐年間建

太平寺

衢州府志城北三十五里後唐天成間建

宋淳熙戊寅年楊適有記

崇勝寺

衢州府志城北四十里宣風鄉唐元和元

年大徹禪師建

玉泉菴 衢州府志城北五十里宋景德年間古佛

開山

國朝康熙三十七年僧明壽重建

靈鷲菴 衢州府志城北四十里古梵竺菴

國朝康熙十四年僧戒生重建今名小九華

佑聖觀 衢州府志在清平鄉宋道士陳大名建

仙集觀 嘉靖浙江通志在爛柯山下相傳宋真宗

嘗賜玉斧劍西安縣志里民因雙白鶴集此而建  
中有對奕二仙及王質與質弟貴像

龍游縣

靈耀寺 衢州府志在縣治西百餘步為姑蔑子故  
宮址晉義熙年建縣令祝聖講約於此為龍邑首  
刹萬厯龍游縣志寺後有諸天閣其伽藍神謂是  
姑蔑子其像猶作進賢冠龍游縣志舊名靈光寺  
宋紹聖間易今名弘治衢州府志後燬元至元乙

丑重建龍游縣志歲久圯明天順間知縣王瓚重修萬厯辛亥知縣萬廷謙重建廊宇東西各若干

間大闢門闢臺墀

萬廷謙重修靈耀寺記由新以之地因乎時援廢以為興存乎

人夫令卑而有土與民之責地方之廢墜有不密不修舉者龍游靈耀寺久矣屏陋不治予謹念左右階序於此觀禮必厚棟大梁遠庭高門然後可以上充揖讓下周步武由是殿宇聿新百室盈堵經始於萬厯三十八年十一月二十五日落成於四十年二月十二日燠費千緡有奇夫天下之事作者常欲其久存而繼者每至於圯廢使繼者皆如始作之心則可以亘遠而無敝此予所為記之意也

國朝順治間寺僧募緣重建未竣康熙十九年復為狂風所毀知縣盧燦捐俸首倡勸募重修

證果寺

崇禎衢州府志在縣東四十里

宋濂證果寺記

道場始於唐貞觀初縣人虞道延捐宅為之悉入陂田其中已而祝髮受戒為開山第一祖稱曰虞延法師云唐季變為瓦礫之區宋初休堂慧公重興無幾又廢今住持靜山仁公捐私索以為衆倡遂造釋迦寶殿演法堂藏經室鐘樓崇廣嚴麗視昔有加往來觀者咸謂象教衰落之時能化灌莽之境而為無上寶坊非賢而智者能如是乎

舍利寺

萬厯龍游縣志在縣東三十二里弘治衢

州府志宋明道二年建中有白塔趙抃記慎東美

書

趙抃舍利寺記古午未之地有舍利塔院年祀彌遠棟壞梁仆邑人江延厚遽新其廢建釋迦

殿增葺法堂方丈門廊官院無虛用四萬錢起明道二年九月九日迄慶厯四年六月十九日成明

年十月十二日始為記銘曰修身治心得佛之深清淨慈智乃佛之事相好顯顯金碧穹宇雖曰外

飾俾人內恭斯廟有塔是瞻是崇完堅弗隳永焉無窮嘉祐二禩素秋之季建者江氏銘以為識王

守仁舍利寺詩經行舍利寺登眺幾徘徊峽轉灘聲急雨晴江霧開顛危知往事飄泊長詩才一段

洛洲興沙鷗莫浪猜

國朝康熙十九年知縣盧燦令僧重修

烏石寺 嘉靖浙江通志在縣北四十五里弘治衢

州府志舊名幽巖宋政和二年建紹興二年岳鄂

王張魏公俱有題識

成志寺 崇禎衢州府志在杜山唐杜如晦憇於此

捨宅為寺

回瀾寺 龍游縣志在縣東十里鳳翔洲上宋時永

福寺舊址久廢明知縣萬廷謙重建於浮杯塔前

明季傾圮



國朝康熙四年知縣艾朝棟重建俗名銅佛殿

聖壽寺 萬厯龍游縣志在縣南五十里高僧懶牧

坐化於此有塔崇禎衢州府志梁天監三年僧嵩

建

資福寺 萬厯龍游縣志在縣南三十里宋寶祐間

建有田七十三畝為宋侍郎呂好問置以祀其曾

祖防

龍邱寺 衢州府志在縣東四十里嵩頭陀創建江

總有詩

法安寺

衢州府志在縣南十里唐天祐中建

澱水寺

衢州府志在縣東北十五里晉天福中建

龍洲菴

衢州府志在泊鯉灘下亦名文峯菴

石舟菴

衢州府志在縣北四十五里有奇石如舟

環以清泉其水可愈疾

清梵菴

龍游縣志在縣治西二十五里

俞恂清梵菴記菴舊

為青瓶殿南有塘環數十畝許相傳姑蔑子埋青瓶於此其後漁者深夜取魚有光熊熊網而視之

青瓶在焉其款識蓋上古間物也殿以此名而或又曰先朝推酒務也故至今發土往往得青瓶云環塘村落數百家以殿為里社歲時禳禱祈報於此至萬厯間中廢里人方明敬更為營建以青瓶名近俚改顏清肥是時尚為道院蓋取道經玉池清水上生肥之語也崇禎末年寺僧靈源建大士閣左右翼以僧寮遂燦然為浮屠精舍而武林葛岷瞻侍郎來遊復顏以清梵之目向之所謂青瓶者蓋至是凡三變矣靈源營構既竣恐異日或有失墜因置寺田若干畝以永香火而請予一言以勒於石

崇仙宮 明一統志在縣東梁大同中建即酆去奢

昇仙處

玄真宮 龍游縣志舊稱女宮在治西一里宋端平

中馬侍郎天驥女施宅建

李仔玄真宮記玄真宮者故宋樞密馬公驥之

第也初公無子一女曰時閏為前荆東肅政廉訪使黃頭公夫人亦無子黃頭公卒夫人嘆曰我雖無子賴有他室子可以嗣其宗顧吾以一身承先人顯宦之餘而使他氏繼之勢或不能以永思所以永之者莫若身為老氏學於是因第之廳事為禮神之庭堂為集眾之地其餘庖湍廩田皆因馬氏之舊官其地者以事聞上嘉其義為降璽書曰有司徭役其無與凡若器脂土田強有力者不得奪特賜金額號時閏純靜守貞端靜法師提點官事壽昌尉胡天祥為予言且徵記焉

集善宮 弘治衢州府志在縣西東華山下梁大同

四年建元至正間縣尹張塔喇蘓遷創於此

常山縣

圓通寺 常山縣志在縣南百步外舊名觀音院唐貞觀元年建宋治平元年重修明萬曆十年正殿傾圮募緣重建

昭慶寺 衢州府志在縣西里許常山縣志即西高峯下也唐垂拱二年建舊名惠安宋祥符元年改今名紹興甲子圮趙錢夫捐金募建佛殿後壞明

洪武十五年又建正統六年玉山尹林岱等再修  
併建兩廊嘉靖十五年寺僧明升明順復整佛殿  
易其柱一乃桐木也邑人爭取為琴其音清越四  
十年屋圯署縣通判張澤召圓通寺僧法善住持

募緣重整

王玄昭慶寺詩遠公蘭若萬山中問度  
重來午後鐘窻外白雲飛不去只因長

龍鉢  
心龍

華嚴寺 在石崆山唐宋古剎

國朝順治初住持立濤重修推官孫魯建漱石亭於山

上厯久圯雍正十年錢塘許鉞客游常山愛石崆  
之勝修寺重構漱石亭復於寺西建拱綠亭赤雨

樓十二年鉞之子演又作問莊亭

許鉞拱綠亭詩  
綠暗連天碧亭

臨空翠間雲流千竹逸風靜萬松閒春愛溪邊水  
秋憐寺外山清襟時對此忘却鬢毛斑又赤雨樓  
詩秋杪憑欄望霜林古寺間一行征雁急數點白  
鷗閒偶讀登樓賦時看落帽山支公共茶話香斲

班鴈

欽教寺

弘治衢州府志在縣東二十里舊名欽教

院唐貞觀三年建元至正壬辰燬明洪武十年建

常山縣志萬曆十二年縣令傅良言修復之

保安寺 舊浙江通志在縣北二十五里吳越侍御

史江景房建弘治衢州府志宋崇寧五年重建

程俱

保安寺記常山縣之謝源有保安院蓋江氏之祖侍御公之所建自侍御之世滋遠厦屋日圯開化報德院僧文雅以身律衆日廟月業凡六年而後成其基則因故地闢之稍前又益東築室面勢以便川谷之宜於時距始建百五十九年矣侍御有高行為鄉里敬信初里人有訟累不得直公貽書執政道其寃事直里人進金十鎰以謝公笑斥之里人買金去終不得辭則以金買謝源地構保安寺云景房之孫丞相萬里繼增田土而寺愈振元天



歷戊辰重建明洪武甲辰修

湖山寺

衢州府志在縣東二十里今名廣化寺宋

淳熙三年建後燬

國朝康熙年間重建山頂有湖可漁可田

靈峯寺

衢州府志在縣北三十里宋咸淳年建

茗源寺

衢州府志在縣東三十里宋咸淳二年建

國朝順治間僧大林重建

永平寺

衢州府志縣北三十里唐大中十年建宋

祥符六年賜額趙鼎魏矼范三賢嘗寓此

報恩寺

衢州府志縣北十五里唐貞觀二年建明

為保安寺末年燬

國朝康熙十一年僧正學重建更今名

修道菴

常山縣志在縣西二十五里曹嘉會嘉靖

中都閩萬表遣道人明曉募修常玉通衢功成結

菴以居府判張澤買田十餘畝以為明曉久守之

資菴內有得月亭雲影池諸勝

集真觀 弘治衢州府志在縣南四十步宋宣和庚子燬常山縣志乾道戊子令蘇玘初浮屠於上淳熙丙午令趙善酬復建塔院景定二年請額為集真元至元十六年改為觀後燬至正乙未重建

江山縣

海會禪寺 正德江山縣志在縣西南二百步初禪師誓良卓錫於此梁天監十八年縣人徐殷捨宅為寺廬山僧義隆寓此有白蛇銜花聽經之異賜

名龍華宋祥符元年改今額紹興七年重建佛殿  
明弘治乙丑燬僧弘溥重建

寶成寺 弘治衢州府志在縣東北一里舊為尼院  
名竹林吳越時建宋祥符元年賜今額正德江山  
縣志大觀二年邑人請易為僧刹江山縣志明正  
德丙寅建大雄殿萬厯戊寅建兩廊鐘樓

施水寺 衢州府志在縣東二百餘步大街之西梁  
天監十八年建明成化間重建

仙居寺 衢州府志在縣東南四十里舊名靈岡有

水簾洞諸勝正德江山縣志宋至和二年僧雲隱

重建江山縣志王安石讀書寺中後勅賜今額寺

田舊為豪右所據明毛端簡愷勸諭復還

楊世琦仙居寺

詩偶訪仙居興不慳杖藜徐步叩禪關門迎瀑布  
千尋水地接江郎一簇山鳥道僅容遊屐度虬松  
長許老僧刪數聲清磬雲  
間出暮色蒼茫客倦還

璩源寺 江山縣志在縣東南六十里晉天福七年

建有龍湫石

胡誠重建璩源寺記璩源江山之勝地也石晉時雪川有僧法諲道行超

卓來遊斯地愛其山水迴環風氣凝聚遂結菴入  
定終日四境信嚮乃崇構殿堂像教大興值歲早  
衆叩於師師為之禱相傳寺下靈湫有龍蟄於壘  
石雨遂大作厥後歲時旱澇有禱輒應天福間召  
師至錢塘賜號曰通濟大師寺額曰瓊源善政保  
安禪寺復勅龍為嘉澤通惠侯以衛佛教後以住  
持無主隆替相仍元時芝田瑞公復興叢林丕振  
國朝永樂初野燒延燼寺有田若干畝皆為他人  
所有宣德三年僧會南宗紹念寺廢久徧訪真僧  
得天寧寺文淨俾興復之文淨號天鏡執行峻特  
遂捐衣蓋之贏經營謀畫復其田以給食日漸饒  
裕乃伐木輦土用拓其址重建殿宇視昔規制蓋  
倍焉工始於宣德己酉訖正統戊辰慮後來者  
或昧始末徵言為記是用著之石以示悠久

保福寺 弘治衢州府志在縣南四十里江山縣志

宋元豐六年建明萬曆二十年重建殿前有羅漢  
松二株蒼鬱若虬龍宋時物也

寶陀寺 江山縣志在左坑元至正八年建尋燬明

萬曆間重建

金紹昌寶陀寺詩寶陀何代寺鑿翠倚巖壁迴峯相感抱靈閣此藏書修

篁不見天危閣坐相逼何來梵羅雲一墜化為石  
山風吹不起景狀如蕩激其旁豁豁訝其上樹蘿  
薜玲瓏窺乳竇空響時滴漉微聞素女絃  
清泛出虛寂洞壑窅然深仙靈邀難覩

真巖寺 正德江山縣志在縣西北登真巖下以女

冠詹妙容修煉上昇得名唐末乃為僧刹宋元祐

中郡守沈祖德命僧以珪遷於半山大觀二年賜額江山縣志明萬厯間重建

太平寺 正德江山縣志在縣南三十五里宋乾德元年僧德浩建太宗時賜額天聖四年再建佛殿江山縣志即故縣址也

鹿溪院 江山縣志在鹿溪渡元皇慶癸丑建明萬

厯間改建航埠山

徐慥鹿溪院詩兩岸青山曲趨溪倚山僧屋傍高低一雙鳥鬼

浮沉食無數黃公來去啼花徑暗香風遶送稻田新綠雨催齊老僧正說天台事水自東流日自西



普明寺 衢州府志在縣南十五里宋淳祐年建明  
弘治間重建

法藏寺 衢州府志在縣東南五十里唐貞觀三年  
建明嘉靖二十三年重建

江郎寺 衢州府志在縣南五十里宋天禧二年建  
心航菴 江山縣志在清湖下首因山曲折幽徑逶  
迤有仙壇為乩仙之所後有閣臨池旁一徑以達  
陸舫最上為聽松園瓢林木掩映遠眺數里歸帆

落照儼如圖畫明邑人毛應思建

天雨菴 江山縣志在仙霞嶺上建自宋代

國朝康熙十七年寺燬總督李之芳重建

李之芳天雨菴碑記仙霞

浙閩之衝連峯疊嶂不可紀極嶺之巔有關關之下則天雨菴在焉前數年寇氛滋蔓設伏搗巢殲厥渠魁嚴斥堠置戍守俯瞰天雨菴表裏若唇齒迄今門庭宴如四方至者必停車菴下禮佛而去歲丁巳不戒於火僧正龍玉以興復為請越明年余捐資為倡於是藩司守令各輸金以濟其役而浙閩士庶欣助恐後鳩工庀材葺而新之規模弘敞落成請記於余余惟神臯奧區必藉神靈作鎮以肅民之觀聽菴之肇造始於宋長者孤鶩俯壓山川之氣已五百餘歲而聽其毀諸已乎今者榛

題輪奐有嚴有翼其君子憑軾而臨如入候館其  
小人擔簦以從如依廬舍廟貌吉虔神人胥悅凡  
道出茲嶺瞻依靈輿者當思徒御不驚從此為良  
民善士沐浴教化以歌咏太平其亦可矣是為記

紫微觀 正德江山縣志舊名紫微道院去縣西南

三里元皇慶二年隱士璩可道建明洪武間設道  
會司以徐安道請立為叢林江山縣志成化間重  
建

開化縣

靈山寺 衢州府志在縣西五十步五代時有兩異

僧住此嘗著靈異後皆化去居處嘗有神光宋皇

祐辛卯僧清臣始創寺詔賜今額弘治衢州府志

元末燬至正戊戌重建開化縣志明洪武庚午僧

擇善建鐘樓藏殿千佛閣

解縉靈山寺記開化縣西有山偃然如人臥因

曰臥佛宋興始造寺於山之麓曰靈山寺僧既衆分三寮曰慈廕居其中曰靜照居其左曰雄觀居

其右由是為叢林至今三百餘年可謂盛矣元季燬至正戊戌沙門可玖養琦經營再造景芳道德

繼之而有緒未就入明沙門道源以洪武庚午修建甚盛遂軼於前蓋竭其力幾二十年而施設與

清臣等其功有足傳也

永樂乙酉僧普賜建靜照堂圓通閣

太平院 弘治衢州府志在縣北十五里宋淳熙三

年建弘治開化縣志有僧老詈者人所敬仰睦寇

知其名不敢焚掠而去後燬元大德二年僧守常

重建至正十二年復燬僧亮可增建

庚京遊太平院詩金銀樓

觀倚層巔幽絕由來隔市廛高樹鳥啼秋色裏斷橋人語夕陽邊林深霧重鳴疎雨崖險風高響落

泉聲利輪蹄無路入竹門長鎖薜羅烟

寶積院 崇禎衢州府志在縣西三十五里宋端拱

二年建弘治開化縣志元壬辰燬僧戒月重建

汪相

如寶債院詩秋容未見麥先老春事無人花已休  
且借江山助詩興莫因風雨作羈愁荒村終日倦  
奔走蕭寺可人真逗遛一炷爐香小牕下臥聽雲  
木叫鉤輻洪樵實積院詩欲入冰壺願未償白雲  
招我入山房雪濤細叩煎茶飲水月閑傳煉墨方  
聽穎師琴忘俗累話參寥事憶家鄉僧門酌客真  
多禮只在銅  
爐一炷香

太康院 弘治開化縣志在縣南五十里周顯德元  
年建有靈應道者焚修於此言雨暘無不應後坐  
化於山之右其地至今不生草寺僧以其鎖骨塑身  
立閣奉之遠近敬信遇早禱祈常以法身之輕重

為雨不雨之驗

程俱太原院詩瀟瀟僧院在山阿春日尋幽得獨過一徑落花人跡

少四簷喬木鳥聲多端明古墓生芳草聖者香祠長薜蘿乘興杳然迷去路禪衣和月醉婆娑

龍華寺 衢州府志在縣西二十里晉天福四年建

宋元豐間有僧修意受法於龍華傳教師道圓後從佛印禪師遊大觀初復歸龍華示寂又有了空者與胡寅程俱江偉李光及丞相趙鼎侍讀范冲相友善有倡和詩甚多

國朝康熙初僧湛圓重建

招福寺 衢州府志在縣東十里宋端拱二年建趙

清獻公抃舊遊處有真如軒公題壁

雲門院 衢州府志在縣西雲臺鄉宋開寶中建程  
俱退寓於此

清源院 衢州府志在縣南二十五里宋景定二年  
建明洪武中重建

慈恩堂 衢州府志在縣東宋建元季圯明初重建  
管理通濟橋



國朝改為禪院

菩提菴

開化縣志在縣北小山嶺萬厯間建

玉霄宮

開化縣志在縣北四十里名勝志元道士

王自然棄家修煉於此有道行能致風雨延祐間

即其所居建玉霄宮崇禎衢州府志元末燬道士

王允中重建明洪武二十四年立為叢林

頤真宮

開化縣志在縣北鐘山下宋建炎間道士

王惟迪建元末燬明永樂間道士王允中重建

國朝康熙二十一年道士葉行進重建

嚴州府

建德縣附郭

報恩寺

嚴陵志在府城內宋慶厯中郡人沈文慶

捨基建僧如實開山元末燬明洪武二年僧智德

重建歲久傾圮景泰元年僧文斌募新之弘治四

年知府李德恆命僧宗廣重修建德縣志嘉靖十

五年改為嚴陵祠萬厯年間祠移於建安山麓仍

於山門葺小屋以識古刹焉

國朝康熙二十二年僧普敬重建大殿

玄妙觀 明一統志在府城內西北唐景龍中建名

龍興觀宋大中祥符元年詔天下建天慶觀即改

名天慶四年詔即天慶觀建殿以奉太祖歲時長

吏率官屬朝謁著於令嚴陵志元元貞元年詔易

江南諸路天慶觀為玄妙觀元末燬明洪武初李

文忠即故基重建玉皇殿永樂宣德正統天順間

相繼興復鼎建兩廡山門殿西為紫微樓下為真

風堂左右為景星南樓為方丈又南為治事廳東  
為迎仙館南為三清殿規模壯麗為一郡偉觀建  
德縣志崇禎年間推官馮秉清重修

國朝康熙二十年知府任風厚重修仍置月臺下班亭  
二座前葺大坊扁曰玄妙觀今為歲節文武習儀  
祝釐之所

建德縣城外  
寺觀

九峯寺 嚴陵志在縣西北五里武定門外倍郭塢

宋寶元二年建清涼文益禪師開山邑人王嗣隆

捨基政和五年燬僧自南重建山有九峯環列故

名

新定續志前為九峯巷後請州城廢寺易其額

元末燬明洪武元年僧

乾元即舊基重建嚴州府志嘉靖間廢舊址為有  
力者所得僧道源復建於風礪橋萬厯三十六年  
僧德欽復古址鼎建殿宇煥然一新

天寧禪寺

嘉靖浙江通志在府城南五里嚴陵志

宋慶厯中僧道明開山名廣靈寺崇寧二年改為

崇寧萬壽禪寺政和元年改天寧紹興七年改報恩廣孝禪寺明洪武己酉僧志滿重建復名天寧宣德正統成化間僧紹宸道浩戒恩前後增剏氣象軒豁甲於一郡諸寺焉

靈石寺 嚴州府志在縣東守祿村舊名靈石院一名烏石寺五代梁時長守禪師開山宋建中靖國元年知州馬玘改今名嚴陵志明洪武二年僧知永重修

仁王教寺 嚴陵志在縣東南翁村舊名仁王院吳

天璽間支遁禪師開山年久圯宋嘉定間誠禪師

重建

崇勝教寺 嚴州府志在縣西唐村舊名龍山白佛

院宋大中祥符八年賜名崇勝院時有僧義澄號

長坐不睡長老真宗嘗賜以詩院舊有真宗仁宗

賜義澄劄子御書後燬明萬厯三十九年僧性理

重建改號龍門禪院

玉泉寺 建德縣志在城北烏龍山麓宋時有陳學

古隸書玉泉寺三字寺西有泉如噴王建亭其右

寺之上有石佛歲久漸長所謂息石也明萬厯二

十三年邑人蔡良士於石佛左建一靜室修懃於

上僧人遂大改建三十五年知府毛志尹即山泉

之上建官廳三門題曰源頭活水

張元電遊玉泉寺詩石佛山品

古茅堂秋草深流雲栖塔樹飛絮貼禪心高閣懸燈在危蘿碍日沉乘閒一登眺留此壯雲林

國朝順治年間僧深谷重建



寶華寺 建德縣志舊名法言寺在和義門外放生  
池中寶華洲上即嚴之西湖也四面環水中有一  
墩上建藏經閣

國朝康熙五年知府劉茂先復建一閣於東扁曰曇花  
界竹木森繞名人遊咏甚多

圓通院 新定續志即高峯院舊浙江通志在府城  
東興仁門外東津山上嚴陵志唐善導和尚開山  
院有靈感觀音像遇旱禱雨有應宋紹興七年知

州胡寅作亭其上以近嚴陵瀨名曰高風亭年久

院圯亭廢建德縣志明永樂二十年僧自忠重建

萬厯二十年僧真宿重修

馬仲珍遊園通院詩山空不隱響一葉落還聞

龍去遺荒井僧歸禮白雲蟲絲昏畫壁嵐氣濕爐  
熏睡思殊無奈茶甌易策勲趙抃書圓通院水閣  
詩風送荷花香滿闌上人宴坐水雲間  
時中靜極先通達豈特浮生半日閒

尊宿菴建德縣志在小西門外一里唐時僧道明

織蒲鞋養母處人以其有退黃巢之術稱為尊宿

屢建屢圯

國朝順治年間知府袁一魁捐俸修康熙十四年僧西臺復修

粉泉菴 嚴陵志在縣西北烏龍嶺菴下有泉從石竇中流出色白如粉因名

淳安縣

轉教寺 嘉靖浙江通志在縣治西晉升平中建嚴陵志宋天聖中詔新之元至元六年重建俗名西寺僧會司在焉冬至等節習儀之所明弘治四年

知縣劉麓重修

貢師泰建德路西寺詩山門東轉步廊深長日禪房占綠陰松徑雨

晴添虎跡竹軒風冷聽龍吟上林久說相如賦故里徒誇季子金獨坐匡床看明月不知涼月濕衣襟

龍華寺

嚴州府志在縣南和義鄉嚴陵志舊名永

泰寺圖經云寺有寶大二年都岳將方鄴等乞重

修狀後判依執押字又有寶正三年睦州請僧住

持帖後繫司空判軍州事郭押皆見存按寶大寶

正皆錢氏年號則此寺建於五代以前也宋政和

三年以犯哲宗陵名改今額

龍泉寺 淳安縣志在縣東五十五里舊名龍泉院  
唐咸通七年建有泉一泓能出雲雨以蘇旱乾疑  
有龍在焉因名宋政和六年縣人裒錢一新諫議  
大夫江公望為之記

普安寺 舊淳安縣志在縣南二十里宋建隆三年  
建明成化十八年邑人商輅新之中有文毅公祠  
長子侍講良臣次子少卿良翰配享焉隆慶四年

知縣鄭應齡重修

石佛寺 舊淳安縣志在縣南三十里宋乾德元年  
建相傳富常潭有石佛見長六尺五寸迎置於院  
因名焉

靈瑞院 嚴陵志在縣東四里舊係靈嚴道宮漢乾  
祐二年改為僧院易今名元元統二年僧如琪重

建明景泰五年僧普惠新之俗名東寺

胡拱辰靈瑞院碑記

靈瑞院前代建豎聖朝定制萬壽節與千秋正旦  
長至先三日在外文武羣臣預擇近地佛氏居習

慶賀禮至期則行之公署淳安縣郭外東則是院在龍山之陽去縣四里西則轉教寺在雉山之陰去縣二里其地皆明敞靜幽可以歲習是禮亡何而院之殿閣漸圯住僧普慧募衆緣修之山門內外位置竝深像設完美願力既竣樹碑於山門請予記其始末凡百檀越悉列之碑陰

舊淳

安縣志明隆慶三年知縣鄭應齡又於寺後龍山巔建碧霞宮題曰龍山第一宮

柵源院 嚴陵志在縣東北昌期鄉圖經云院有至道三年知縣事孫譙撰重建殿宇記云越王勾踐襲吳兵行之際於此源口立砦柵寺因地而稱又

曰寺有聖者像鄉民歲時旱暵禱必獲應又曰院壁得咸通十三年沙門師魯書武宗詔毀天下佛寺聖者之像巋然曾不焦壞洎象教復興吳人王璿得之於山塢泥潦之中相好儼然益彰是教之不可泯如此

龜石菴 嚴州府志在縣西十里舊名溪心寺一名小金山寺左右石洞可以納涼前有山橫出半江上有水陸寺登臨者目為小金山下一石臥灘若



龜曳尾名曰龜石灘

程啟政龜石菴詩千尺波心得異觀水雲中鎖碧噴蛟

龍近窟蟠根久鶴鶴危巢墮影寒白社可能專佛印紅塵曾不到漁竿他時浮玉論形勝擬酌山靈

說二難

尹山菴 嚴州府志在縣西南七十里淳安縣志宋

淳熙七年建其佛汪姓越國公華第八子也修真

化此

蓬山菴 舊淳安縣志在縣西七十里萬花谷口對

方壺嶺故名倚蓬山下瞰大江上有石洞蝙蝠集

於其中見人則飛舞撲面

天樂觀 嚴陵志在縣東北四十里五代漢乾祐元

年建宋重和元年賜今名

方聞天樂觀記淳安官觀有四皆廢無有惟天

樂觀獨存者舊相傳觀本在常樂鄉文高里昔因洪水漂泛聖像至昌期鄉湖山下止焉從而建立於此村毗指舊鄉名之云常樂觀初始於五季乾祐增修於國朝乾興殿廡幽深不侈不陋溪湖廻環嶺岫巍峩迥出塵境徽宗皇帝欽崇天道向意真風詔天下宮觀三十間以上者賜額郡守許堯夫以聞得旨以天樂觀為額實重和元年九月未幾燬道士胡知章募緣重建所賜勅額募刻於石因敘始末於其下以彰不泯

桐廬縣

圓通寺 嘉靖浙江通志在縣西唐會昌中建嚴陵

志名聖德寺宋大中祥符七年賜今額寺有觀音

像祈禱輒應有一泉名曰稱心味絕甘昔有老僧

欲植萬松於路鄉人慮其蔽田訟於縣縣以符詰

之僧荅以詩曰本不栽松待茯苓只圖山色鎮長

青老僧他日不將去留與嚴城作畫屏事遂已殿

宇歲久圯明洪武八年僧安隱重建

金維林圓通寺詩遠公蓮

社碧山隈愧我來遊未姓雷狂象到門依忍草餓  
烏隨磬下生臺虛堂影寂留枯木老衲心空悟却  
灰聞說三車皆妙諦  
諸天終日散花來

國朝順治年間僧海德募建魏煥倍昔

新會寺 新定續志新會院居萬山間地渴水宋紹

興間有羣蜂屯佛殿側僧鑿之得甘泉桐廬縣志  
在縣東十里元末燬明洪武中僧妙雲重建

鍾山寺 嚴陵志在縣西三十五里舊名鍾山院唐

大厯中建方慤留題云地因鍾氏建招提世傳鍾

氏居此山百餘年忽一夕杳冥中聞鐘磬聲空中

夜有光遂捨宅為蘭若舊有五色舍利及輪藏宋

康定間僧思蘊鼎新

方鼎鍾山寺記桐廬山迴水遠道迂徑曲陀蛇蜿蜒行十

餘里峯巒環合而鍾山秀峙於其間山之麓有故  
蘭若在焉橡棟傾頽蓋有年矣宋康定初主僧遇  
明完葺未就繼得思蘊上人白業夙著清衆所歸  
勤勞晝夜彌三十年而結構一新經制有度丹楹  
刻桷之璀璨塗金甃玉之晶瑩與夫茂林修竹長  
松古檜蔽虧而陰森此所以嚴妙相而崇法宇也  
廡牖之虛白泉石之潺湲篆烟引幽磬發晨講暮  
誦雲瓶虎錫嘯咏而翱翔此所以集淨衆而闡真  
乘也噫事之廢興常在乎人憂勤作其始而佚樂  
居其後古之道與思蘊用心不懈能成其志如此

故予樂書其事以告其徒庶知  
經始之勤而異日無隳其成也  
歷元傾圯明洪武

十六年僧德彰重葺桐廬縣志萬曆年火重建

長樂寺 新定續志唐乾符間吳琬捨水竹園為寺

桐廬縣志在縣西南梧村明洪武二十二年僧時

茂重建成化十二年僧懷端葺之

寧因寺 桐廬縣志在縣西北十五里梁天監二年

中書舍人劉元珣捨基為之明洪武年重建

淨土寺 嚴陵志在縣西北三十五里舊名淨土院

晉天福九年建相傳淮海王嘗賜鐵塔一座今無存宋大中祥符間賜今額元末燬明洪武四年僧法景重建嚴州府志正德中僧惠昇復新之

靜居院 嚴陵志在縣西北法華山下新定續志晉高僧曇翼誦經之所桐廬縣志明洪武四年僧似岳重建

大鐘院 嚴州府志在縣西北三十里院有大鐘故名桐廬縣志在清涼山下周禪師道場也明洪武

年建後圯崇禎年重建

紫霄觀 明一統志在縣東儒學右晉時郭文常往  
來於此既而白日上昇邑人因塑像建紫霄宮以  
奉祀之嚴陵志舊有靈耀郭真君像即文也唐末  
鞠為荒榛邑人即其基建應祈普通院宋政和六  
年詔還為道院增葺宏麗經方臘亂悉燬後相繼  
興修元末兵燹止存石柱山門明洪武二十年道  
士皇甫志隆重建宣德中道會吳太素復新之



洞明宮 桐廬縣志在縣東四十五里新定續志宋  
嘉定間道士張守廉請遂安廢額建嚴陵志龍虎  
山道士張守廉來遊吳越道經富陽鄉民訴有妖  
魚為患守廉投以鐵符遂息鄉人感之相與結茅  
於碁盤山未幾徙居桐廬松山之陽四方羽客聞  
風輻輳乃益廣其居號為東陽洞歲久傾圯明洪  
武二十九年道會張本立修葺宣德四年道會方  
可循等重建紫微樓靈應殿

遂安縣

無碍寺 萬厯遂安縣志在西門內嘉靖浙江通志

唐貞元中建嚴陵志舊名無碍院明天順間僧文

昇重修

吳良無碍寺記遂自唐代肇剎賜額無碍至洪武中扁為第一山蓋前峙婺宿織嶺

筆架諸峯後擁五獅襟帶仁義兩山龍宮紺宇樓閣參差笏檀香積厯千餘載信我遂第一山也

後為祝釐之所

國朝康熙五十二年知縣陳學孔重修

惠安寺 嚴陵志在縣東二十五里唐時建明天順

間僧永祐重修寺前有羅漢松二株大數十圍相傳為開山僧所植自唐迄今殿宇屢毀而二松獨蒼然對峙於門之兩旁焉

靈巖寺 萬厯遂安縣志在十七都遂安縣志唐大厯中建宋天聖中賜額廣法禪院明成化間僧思繹增建廊廡易今名

慈雲菴 遂安縣志舊名柏山菴山水幽靜竹木森疎為一邑勝明萬厯間僧無量募建

毛升芳遊慈雲菴記癸丑

秋予燕遊歸會諸子於慈雲禪院時霜威方作平  
曠秀衍疊嶂參差秋容哀颯紅林如繡相與拾級  
循途攀援登躋螺髻諸峯回視漸下矣巒迴徑轉  
有亭翼然荒榛斷梗與敗址頽垣相次數折而上  
平岡松篁檜柏蔭日籠陰寒氣入人衣也折而東  
石室聳出山門之左有池一碧泓然循大雄殿而  
西斗室軒朗澄池淵寂前有修竹  
萬竿敲金碎玉令人魂夢清映也

# 公山菴

嚴州府志在縣北十七都

方象璜公山菴詩磬定風不喧

嵐收日正曉却疑人影來山犬吠飛鳥怪石堪  
娛客亭前自作供時時風雨動一片鐵芙蓉

語石菴 遂安縣志在縣西五里多奇石向沒榛莽

中明天啓間邑人姜習孔建上有姜公祠

乳洞菴 嚴陵志在縣南八十里宋紹興間官兵擒

繆羅於此其鄉人建屋居僧兼奉孔釋以化暴戾

云明宣德間燬僧智安重建

胡子澄遊乳洞菴詩  
結屋青山下幽深不

記年泉聲秋霽雨鐘響暮暗天入洞尋僧  
伴穿雲見鹿眠徘徊不忍去夜宿佛堂前

洞神宮 明一統志在遂安縣西百餘步宋紹興間

龍虎山道士倪太和遷於今處新定續志舊在縣

西四十里額存宮廢縣岳祠東偏舊有道院紹興

間縣白郡以宮額隸焉因為祝釐之地

吳晉之洞  
神宮醮堂

記萬年鄉舊有洞神宮廢久矣紹興初載有道士倪太和自龍虎山來寓依嶽行宮東偏草荆數楹卑陋偏仄不足以奉高真常請於郡復洞神之名欲增廣之郡許請於朝久未報紹興十有七年夏五月吳興錢公來宰是邑視事之初祇謁祠下立無廡升無階不成禮公退而嘆曰星流華渚伸萬壽之祝雨暘不時致請禱之誠所不可忽也爰庀材僦工芟蕪棘闢庭廡堂宇一新貌象畢陳以十八年二月六日經始三月十二日休工蓋其經畫先定故見於事如是之敏也

嚴陵志

歷元歲久傾圯明洪武元年道士胡至柔重修

壽昌縣

大廣安寺 嘉靖浙江通志在縣治東南唐乾元中

建嚴陵志名永寧寺宋改廣安宣和間燬縣人新

之元皇慶間復燬僧克潛又新之詔賜今額方道

廣安寺記寺在壽昌縣萬松山沙門為國祝釐之

都道場也開基於唐守一禪師寺名永寧我朝曰

大廣安寺成宗皇帝特旨也大德初奉玉音賜黃

金錠一西番布百疋武宗皇帝元年載奉特旨仁

宗皇帝正位宸極又降特旨凡以護持寶地鞏固

皇闕山門之盛可謂至矣延祐乙卯季秋九日寺

燬僧克潛謀新捐貲募建自延祐迄至正凡三十

載增田背構乃克完美夫梵教莊嚴周遍邇藐

茲一山屢奉絲綸皇恩寵

渥非大願力能致然耶嚴州府志明正德初改

建儒學仍存其東隙地嘉靖間提學陳儒以其地

入儒學建啓聖祠乃改建寺於南門外明一統志  
寺僧靜綱與民間易地建寺南門內

聖跡寺 嚴陵志在縣東二都舊名聖跡院晉天福  
元年建宋紹興二十八年里人重葺壽昌縣志明  
嘉靖間寺僧元亨重建前殿

萬福寺 嚴州府志在縣西七都唐大厯中建相傳  
時有石佛從地湧出今石佛猶存

朱佛菴 新定續志在縣西崇恩院側有塑於龕者



曰朱佛歲旱祈禱輒應相傳昔有農朱姓耕田誦佛於此遇亢暘常有雲覆之諾人以雨輒驗邑人指為活佛後跌坐示化人為立菴宋寶祐間知縣劉廉狀其靈異請賜號

崇因寺 嚴陵志在縣西八都舊崇恩院宋紹興間樞密葉義問建以奉朱佛香火請額於朝曰崇因報本禪寺咸淳壬申僧時芳重建今寺有樞密像存焉

洞巖寺 嚴州府志在縣西北十都宋明道二年建

有靈棲洞歲旱禱雨輒應嚴陵志元泰定元年僧如蘭重建

真覺禪寺 壽昌縣志原名宋公菴在縣西門外宋元祐間建

國朝康熙十二年知縣羅在位捐俸寺僧寂斌募建後殿及觀音閣

分水縣

慶雲寺 嚴陵志在縣南慶雲山下唐長慶中以雲  
見名山即山建寺亦以名焉元大德三年僧智明  
重建嚴州府志明正統間邑人王友諒修嘉靖甲  
子重新之

安禪寺 分水縣志在縣西三十里梁大同二年建  
嚴州府志明洪武五年僧懷仁即舊址重建

玉瑞寺 嚴州府志在縣北三十里寺有石佛新定  
續志石佛長不盈尺舊傳陳時所造嚴陵志舊名

國榮禪院周顯德元年福巖將花應重建元末燬  
明洪武初僧慧俊正統間僧妙祥相繼新之

月溪院 分水縣志在縣西北四里宋乾道六年建

嚴州府志明正統成化相繼新之萬曆四年僧會

隱仙募緣重建

陳良月溪寺詩磴道縈迴幾曲登  
好山四面列雲屏半空青碧前朝

寺雙澗流寒六月冰講座衆禪能演梵法堂迎  
客且談經酒酣日暮尋歸路落葉秋蟬處處聽

保寧塔院 嚴陵志在縣南慶雲山北宋慶曆八年

邑民范衍建浮圖五級嚴州府志元燬山嶺有石

靈異巖下水泉不竭舊傳此水通潮有龍潛焉院  
崇禪教明弘治間僧道堅移建佛殿於正巖之上  
嘉靖十一年道人德興重建

千佛菴 嚴州府志在縣東南十里相傳昔邑人方  
子客以母病即山巖石鑿千佛以禱之因勅菴

浙江通志卷二百三十三